

| |
|-------------------|
| مصر هي أوصتي . |
| تأليف : خالد دياب |
| إخراج : خالد مرعي |

افان تيتير 1 - نهار - داخلي

طائرة - درجة رجال الاعمال

النور مُطفىء فى الطائرة والكاميرا تسير من الخلف للأمام ونسمع صوت ضحك مستمر ومتصاعد صادر من الامام .. ومستمر على حوار الركاب المتدمرين ... **نري المضيفه تسير بعربة المشروبات**

راكب

مش معقول كده .. ده من ساعة ما طلعتنا **وهو عامل الدوشه دي**

راكب اجنبى

I can't belive

راكب (للمضيفه)

لو سمحتى روحيله قوليله يهدى شويه

الضحك يتوقف ثم يعود

المضيفه

قلنالاه والله بس بيسكت شويه وبيرجع تانى .. اهوه

المضيفه تدفع عربة المشروبات في اتجاه (مصرى السيد العربى) الذى يضع سماعات الهيدفون فى اذنه وبجواره طبق مكسرات يأكل منها ويشاهد فيلم كوميدى مصرى ابيض واسود وبجواره راكب شاب غارق فى النوم ويضع القناع الاسود الخاص بالطياره على عينه .. وهذا الشاب من نوع الشباب الذين يضعون فى كل جملة عربى كلمه او اثنين انجليزى على اساس انه شاب لغات وكده .. **المضيفه تصل لمصري** وتصب له القهوة ثم تناوله السكر **وعليه لبن صغيرة....** مصرى فيرفع السماعات

المضيفه(لمصري)

اتفضل بس لو سمحت بجد الناس متضايقين ومش عارفين يناموا

مصرى

طيب ما الاستاذ اللى جنبى نايم عادى اهو .. خلاص خلاص .. I am so sorry...**القهوة دي ديكا ف ؟**

المضيفه

سوري نسيت

المضيفه تاخذ القهوة التى صبتها لمصري وتصب له من اناء آخر هو القهوة الديكا ف...مصري يناولها السكر واللبن ايضا

مصري

والسكر سويت لو ..واللبن سكيم ميلك

المضيفه تأخذ السكر واللبن وتناوله غيرهممصري ينظر مصرى للشاشه فيرى عبد المنعم ابراهيم وهو يقول "الغوث الغوث" فيضحك بشده ...**المضيفه تنظر بعتاب**

مصري

لألا .. رهيبه .. هاضحك على حته الغوث دى بس

مصري يقلب المحطه فيرى فيلم لاسماعيل ياسين وهو يحرك فمه بالحركه الشهيره فيضحك بصوت على غصبا عنه ولكنه يكتم الضحك ويضحك فى سره وعيناه تدمع من الضحك والاهات .. ثم يضحك بصوت على فجاءه ..

مصري

رهيب محمود ياسين ده

الراكب يستيقظ مفزوعاً وينزع قناع العين وينظر للشاشة ثم ينظر لمصرى

مصرى

سورى صحتك .. انا قولت انت ميت

الراكب

انا مصحتش بسبب ضحكك .. انا صحت لما لقيت محمود ياسين هو اللي بيضحك
الضحك ده كله .. قلت مستحيل .. ده اسماعيل ياسين .. مش محمود ياسين

مصرى

اوه .. واو .. اخوه

الراكب

لا تشابه فى الياسين

نرى المضيفه اتيه بعربة الصحف

المضيفه

Newspapear

مصرى

ادبنى كل الجرايد والمجلات المصريه ؟

قطع افان تيترا 1 A - الكاميرا على صورته كبيره وعنوان بالبنوط العريض "حريق هائل بالجيزه " مصرى ينزل الجريده ..
فترى بجواره الجرايد كلها ويده بها حبر اسود بسبب الجرايد وينظر للراكب الذى يمسك بجريده امريكى وينظر ليد مصرى
السوداء مبتسما ثم ينظر ليده البيضاء ..

مصرى (بأبتسامه)

واضح انه من الحريقه .. اواكيد الجرايد لسه منشفتش

الراكب (متطفلا مخمناً)

بقالك زمن منزلتش مصر..صح؟

مصرى (بحنين)

عشرين سنه

الراكب

يبقى هانتعب اوى علشان واضح انك متعرفش حاجه

مصرى

بالعكس ابويا حكاى عنها كتير .. حكاى عن النيل والهرم .. والناس

الراكب (يسخره)

النيل والهرم يس اللي تقريبا لسه زي ما هما

مصرى

واضح انك متشاوم

الراكب يلتقط بلوشور من الجراب

الراكب

لا انا مصري .. نصيحتي لاتصاحب حد.. ولا تأمن لحد.. خذ اقرا كده

مصرى (يستهجا ولا يعرف)

سورى .. الكلام اصله ... العربى بتاعى فى القرايه ضعيف شويه

الراكب

امال كنت بتقراء الجرايد دى كلها ازاي

مصرى

انا كنت بتفرج على الحريقه

الراكب (يقرأ لمصرى)

اسمع ياسيدى .. عزيزى السائح .. احذر من التعامل مع سائقى التاكسى الغير مخصص
لاتعطى بقشيش لعمال المطار .. لاتسأل غير رجال الامن فقط ..

الراكب يضعها لمصري في شنطة اللاب توب...مصري بهم لاجراجها من الشنطة...

الراكب (بنصيحة)

خليها معاك

مصري يستسلم مر غما

مصرى

بس كل ده موجود فى كل مكان فى العالم

الراكب يومئ برأسه كمن يقول له انت حر ثم يفرد الجريده امامه ..

الراكب

هو انت شغال ايه ؟

مصرى (بالانجليزى)

سورى .. اه u mean my job .. / فوتوغرافر

مصري امامه اللاب توب ويضغط زر.. فنري صورته تمثال الحريه .. الخ .. ثم صورته لطفل صومالي عظامه ظاهره وجالس
القرفصاء في مواجهة نسر مترقب

الراكب

ودي انت اللي لاقطها ؟

مصرى

سورى .. لقطها .. لأ دى ملاقيتهاش .. دي صورها واحد from austria
وخذ جايزة .. بس انا شاكك انها .. انها .. متركبه

الراكب لا يدرك قصد مصري ويحاول ان يخمن

الراكب

متفبركه يعنى .. اوكى اوكى .. وجاى شغل ؟

مصرى

عندى معرض فى نيويورك / بعد شهر .. ولقيت ان دى فرصه
كويسه اعرض فيه صور عن Egypt .. واغير شويه من وجهه نظر
الغرب عن مصر و هارجع اشترى بيت واعيش فى مصر

المضيفه توزع كروت الوصول ... المضيفه تعطى لمصرى والراكب كارتين بنفس اللون...

المضيفة (لمصري والراكب) حمدالله على السلامه

مصري يأخذ كارتته...الراكب يري المضيفة باسيوره الامريكي الازرق...المضيف تبذل كارت الراكب بكارت آخر بلون آخر

مصري

انا معايا كمان باسيور امريكي بس هناك في امريكا / جيت بالمصري

الراكب

وفرحان قوى .. كان لازم تجيبه معاك

مصري

واتعامل ليه على انى اجنبى وانا في بلدي

صوت الكابتن

" الساده الركاب برجاء ربط الاحزمه استعدادا للهبوط
في مطار القاهرة الدولي .. ومرحبا بكم في القاهرة"

قطع افان تيتير B 1 - مصري معه مفك صغير و يربط مسمارا في الكاميرا ثم يضغط الزر فيجدها تعمل

مصري (للراكب)

زارر الباور بيعلق .. بعد اذنك اصور اول صوره لمصر

بداية التترات

مصري يصور من الشباك ونري مشاهد جميله ورائعه لمصر من اعلى على نزول التيتيرات وصولا لأسم المخرج

نهاية التيتيرات

م / 2 نهار- خارجي

سلم الطائرة

الركاب بالكمامات .. ومصري معه شنطه الكاميرا واللاب توب ويتوقف وينظر بعينه في الافق ويأخذ نفس عميق يعبر عن وحشة لمصر .. وبمجرد أن يشم الهواء يبدأ في السعال ووجهه يحمر كأنما يختنق فيوقف السلم .. نرى راكبه يبدو عليها الضيق

الراكبه (بلطم)
اخلص... بتشم في ايه .. بتشم في ايه

مصري (وهو يكح يشده)
كده خلتنى اشرق ..

مصري ينزل السلم وخلفه الراكب

م/ 2 نهار - داخلي

الجوازات

مصرى يهم بالدخول لشباك الجوازات الذي يجلس عليه ضابط عابس الوجه (اتم) فى نفس اللحظة دخول الراكب ايضا ..
فيتعازمون على بعضهم .. وفى النهايه يتقدمون وكأنهم مع بعض .. كلاهما يمد باسبوره امام الضابط فى نفس الوقت ..
الباسبوران (المصرى والامريكائى) بجوار بعضهما على الكونتر

الضابط (المصرى بز هق)
انتوا مع بعض ؟

مصرى
لأ .. كل واحد لوحده

نري الضابط ينظر للباسبورين كأنه يفكر ايهم الاول ثم يتناول الباسبور الازرق...مصري يعود ادراجه عند خط الانتظار

الضابط (للراكب بود)
اتفضل حضرتك

الضابط يختم باسبور الراكب ويعطيه له ثم ليغادر الراكب وهو يشير لمصرى بالباسبور الامريكائى...مصري يتقدم للضابط

الضابط(بقتامه)
فين ختم الخروج ؟ انت خرجت من البلد امتى ؟

مصرى
كان بالليل تقريبا .. مش فاكتر .. اصل وقتها كان عندى سبع سنين

الضابط
طب خد املى الاستماره دى

الضابط يشير لمصري ان ينتحي جانبا ويشير للشخص الذي يليه ...مصرى ينظر فى الاستماره المكتوبه بالعربى ...مصري
يتوجه للضابط

مصرى (الضابط)
هى السفاره المصريه بالسسين والا بالصاد ؟

الضابط يترك باسبور الشخص الذي امامه وينظر لمصري

الضابط
السفاره .. بالسسين

الضابط يعاود متابعة الباسبور الذي امامه

مصرى
لأ انا قصدى المصريه بالسسين والا بالصاد

الضابط متأففا يترك الباسبور الذي امامه ويقلب الاستماره لمصرى على الجبهه المكتوبه بالانجليزى

مصرى
Sorry what the mening of place of issuing

الضابط لايفهم فيقلب الاستماره للعربى

مصرى

ما انا مش فاهم الوش ده

الظابط يأخذ الاستماره والقلم

الظابط (بضيق)

هات هات انا فاهم الوش .. دانت زنان

م / 4 نهار - داخلي

يجوار سير الشنط - الجمارك

نرى شنطه وحيدته تلف على سير الشنط .. ونرى الراكب يضع شنطه من ضمن خمس شنط على عربته الشنط .. ومصرى يأتى مصري والراكب ونرى العمال المرتزقه .. ومصرى والراكب يتقدمون من مفتش الجمرک

الراكب

اكيد اليتيمه دى شنطتك

مصرى

كانت بتعيط اكيد ؟

الراكب

اسمع كلامى .. لو عايز تمر بسرعه من الجمرک شوف اكثر واحد شكله طبيب وخط شنطتك ادايه .. وبعدين خط ايد على الشنطه وايد على السوسته واعمل نفسك هاتفك السوسته قبل مايسالك معاك حاجه .. هايعديك علطول

مصرى

بتهزر طبعاً

الراكب

اسمع كلام اللى فاهم عنك بقى .. انا قبل ما يبقى معايا ده (مشيرا بالباسبور الامريكى) .. كنت بعمل كده

مصرى

نو واى اعلم كده ..

المفتش يري باسبور الراكب الازرق في يده فيشير له بالمرور

المفتش

Well come to Egypt sir

الراكب يمر ويشير لمصري بالباسبور الامريكى

الراكب (لمصرى بهمس)

اعمل اللى قولتلك عليه

مصرى يرى شخص متبهدل تفتيش .. المفتش ينظر لشنطة مصرى .. مصرى يضع يد على الشنطه والاخرى على سوسته بنطلونه ويفتحها امام المفتش

المفتش

انت بتعمل ايه !!

مصرى

بصراحه بقى هافتحلك السوسته علشان انا / مستعجل جدا

المفتش (مبتسماً)

هاتفتلى السوسته .. ماشى .. طالما بتحب تقلع اتفضل معايا

م / 4-1 نهار - داخلي

غرفة تفتيش

مصري واقف بالبوكسر والفانله الداخليه وعسكري يمرر جهاز كشف المعادن علي جسم مصري...الجهاز يزمر عند مؤخرة مصري...العسكري ينظر للمفتش بتساؤل ...العسكري يمرر الجهاز مره اخري علي جسم مصري ليزمر مره اخري عند مؤخرة مصري

مصري
دي شريحة في الحوض

المفتش(العسكري)
يقلع

مصري
البوكسر !!

المفتش (جسم)
كله

م / 5 ليل - خارجي

خارج المطار

مصري يقف خارج المطار ومتبهدل على الآخر وهدومه طالعه بره الشنطه وواضح انهم عملوا معاه الصبح .. يشرب اخر شفته من زجاجة مياه معدنيه ويبحث عن زباله ليرميها ولا يجد .. ونرى شخص (راضى) ينادى على مصرى

راضى (بانجليزيه ركيكه)
لا..موزين سير ؟

مصرى
ياريت .. انا ..

راضى
مبركباش مصريين .. فورين بس

مصرى
فورينار .. والمصريين مالهم !

راضى
بيفاصلوا وبيضوحروا وبيسوجروا فى الاوبيج وبيحورا فى اى هتش

مصري
ايه الكلام ده .. انا مش فاهم حاجه .. هو حضرتك مصرى

راضى
انت شكلك اول تيجى مصر .. تعالى هاوصلك وهاخد مياهه مقفوله .. رايح فين ؟

مصري
فندق (كذا) .. **والموزين بتاعة حضرتك** بقى سيدان ولا فان .. علشان الشنط بس

راضى
ايه التانيه دي ؟

مصري (شارحا بيده)
فان .. اللي هي .. عارف .. اللي بابها كده ..
رايح جاى .. اللي هو تبعته كده يقوم يرجعك تانى

راضى
وبيرجع بأيده فاضيه والا ملأينه .. باب ايه ده !!

مصري (متذكرا)
اه .. باب فرار

راضى
جرار .. آه آه .. هي دى اللي معايا .. تعالى

راضى يسبق ومصري يسير خلفه صاحب الشنطة ومعه زجاجة المياه التي لا يعرف اين يرميها

م / 6 لیل - خارجی

موقف المطار

راضی یفتح الباب الجرار للميكروباص

مصری

دی مش لموزین

راضی

انت مش قولتلی الی بابها فرار .. فرار ده ولا مش فرار؟

مصری

فعلا بیفر .. انا الی کان مفروض ابقى ادقق فی کلامی

قطع 6 A - مصري يضع الحزام و حزام راضی سایب ویرمیہ علی بطنه

راضی

وانت ملکش قرايب في مصر كمنك نازل في اوئل يعني

مصري (بود)

اوئل .. تقصد هوتیل .. لا أنا ملیش حد هنا

راضی

طب نصیحة اخ لاخته .. لازم تبقي صایع كده وحرك والا هاتتاكل

مصری

لااااا متقلقش علیا .. انا امریکا مغیر تنیش .. انا صایع جدا

راضی

ولو عایز تغیر دولارات قولی علشان میتنصبش علیک

مصري (بصیاعه)

انا .. ده انا انصاب جدا .. بتغیر بكام الدولار ؟

راضی

باتنین جنیہ

مصری

یا مان ..

راضی یدرك ان مصری فاهم

راضی

لأ ناصح .. هاغیرلك علی خمسہ وعشرہ كده یاسیدی

مصري ينظر فی ساعتہ

مصري (بجدیہ)

و علی خمسہ وعشرہ لیہ ! الساعه لسه ثلاثہ .. والا مش معاك دلوقتی

راضی

اهلا بیک .. نغیر حالا .. علی کام

مصری

.. انا كنت بجرب انصب عليك علشان تعرف انه ما بيتنصبش عليا
.. اوكى على جنبه خمسه وسبعين زى ما قولت

راضى يعطى مصرى رزومه فلوس مصرى

راضى

خد اسحب من دول اللى انت عايز تغيره وهات الباقي

مصرى يستعجب من ثقة راضى فيه ويسحب الفلوس من الرزومه ثم يرجعها لراضى ويشير لزجاجة المياه المعدنية الفارغه في يده

مصري

مفيش باسكت هنا .. باسكت .. ارمي الحاجات دي فين ؟

راضى

ما تقول صفيحة زباله !! م الشباك .. كده

راضى يرمي الزجاجة

مصري (بز عيق)

.ايه ده .. ايه ده .. اقف اقف لو سمحت

مصري يفتح الباب لينزل فيرى مجموعة كبيره من زجاجات المياه المعدنية ملقاه في الارض فلا يعرف ايهم التي تخصه...مصري يعود للميكرو باص

مصري

او كيه .. انت راميتها في الزباله .. انا قولت انت راميتها في الشارع

راضى يتناول كيس به علبه كشري

راضى

معلش ياباشا مفطرطش .. تضرب كشرى

مصري

هى تاكل بقت / يعنى تضرب .. طب ولو عايز اقول اضرب واحد قلم .. اقله اكلك قلم .. تخيل .. غريبه جدا ..

راضى

ماهى كده فعلا .. اكلك قلم اسكعك قلم .. اكرتك قلم .. اهبدك قلم .. كله يمشى

مصري

انت عارف انا نفسي اكل ساند.. سورى .. اسكع ساندوتش فول

قطع 6 B - راضى يناوله السندوتشات ويرمى علبه الكشري من الشباك ولكن مصرى يمد الكيس امامه فيضعها فيه

مصري

ده فول بالايه ؟

راضى

بالسوس

مصري

طب كويس .. انا كنت هاقولك تقوله يحط صوص .. ده صوص

باريكو شكله (بصياحه) ... حساب الsandwiches

مصري يناول راضى جنبه نراه واضحا

راضي(باستنكار)
ايه ده؟

مصري يقرأ من علي الجنيه

مصري(بسذاجه)
جنيه مصري واحد

راضي

انت متعرفش ان الملك فاروق مات ولا ايه ...الحساب تسعه وستين جنيه وخمسه وسبعين قرش

مصري

ياه..ده بابا ده قديم اوي

مصري يخرج محفظته ويناول راضي ستون جنيه

مصري

ستين جنيه اهم

راضي يضع الفلوس في جيبه ومصري ينظر له بصياحه

راضي

مالك ياباشا بتبصلي كده ليه ؟

مصري

فين الربع جنيه الباقي مابلاش الحركات دي ..
ما انا قولتك انا انصب على بلد بحالها

راضي يناول مصري الربع جنيه مصري يقلق من سواقة راضي ويرى الزحام والعشوائيه الرهيبه في السواقه

مصري

ليه الشوارع عامله كده !!..

تاكسي يكسر على راضي ومصري

مصري

بالراحه احنا كده ممكن نعمل حادثه

راضي

سواق الاطش مبيغلطش وكله بالقانون اللي يرمي بوز العربيه الاول ..الشارع بتاعه

مصري(يشك)

وده قانون قانون ولا اي كلام

راضي

الناس كلها ماشيه بيه يبقي قانون ولا مش قانون ...هو اللي كروديا

مصري

كروديا .. دي شتيمه صح ؟

راضي

لا انا مؤدب ومبشتمش

قطع D 6 - راضي يخرج سيجاره من علبة السجاير ويطبق العلبة ويرميها في الكيس بتلقائيه .. والكيس اصبح عملاقا

راضي

ممکن اعمل الو من موبيلك اظمن على الحاجه بس

مصري يخرج موبايله من نوع i...mate الحجم الكبير ويناوله لراضي الذي يستغرب حجمه

راضي

ايه ده .. شايل كابينة ميناتل في جيبك

مصري (لراضي)

بس ياريت متطولش

راضي

الووو .. ايوه يا ام راضي

نسمع صوت حريمي ناعم

مصري (بهزار)

خلاص كفايه كده

راضي (بحب)

جاي والله .. مفيش معايه حته هتية بقلبه

راضي يبتسم لمصري وهو يقول هتية بقلبه .. مصري يرد علي راضي مبتسما

م/7 ليل - خارجى

امام الفندق

مصري ينتظر راضى ومعه كيس الزباله الاسود العملاق .. راضى اخيرا يغلق الخط ويقف قبل مطلع الفندق

راضى

ياللا سلام بقى .. مأكنة حضرتك أهى .. معلىش اصلى
باسبلها موبيلى امكنها عيانه فابطن عليها .. معلىش بس
هانزلك هنا علشان مينفش اخش اكثر من كده امكنى اجره

مصري ينزل من الميكروباص ويُخرج محفظته

راضى

متخلي بقه الحساب عندنا المره دي

مصري

شكرا

مصري يتركه ويمشى

راضى

ياباشا.. ياباشا .. الحساب

مصري (باستنكار جاد)

مش انت قلت ماتخلى

راضى (بهزار)

اشمعنى دى اللى فهمتها .. خلي دي عزومة مراكبيه .. يعني كده وكده

مصري لا يفهم مايقوله راضى وينظر الى البلوشور الذى اخذه من الطياره فيجد مكتوب فيه لسته بالاسعار الخاصه بالتكاسى ..
من المطار حتى وسط المدينه مائه جنيه .. مصرى يُخرج ميت جنيهه

راضى

ايه ده يا باشا ميت جنيه !! انا عايزميه دولار

مصري

دولار !!

مصري يُخرج البلوشور

مصري (بنصاحه)

بص .. من المطار لوسط البلد ميت جنيه .. مش دولار .. او عى تكون فاكرنى كروديت

مصري يتركه وينتج للفندق وراضى لايسطيع الدخول وراه .. ونرى كلب الحراسه يهوهو على مصرى

راضى (بصوت عالي)

وحياة امي لوريك .. انت بتصيع عليا انا ياصابع

مصري (يلتفت له متنكرا كلامه)

انت مش متربى .. وانا ممكن اجى اكلك قلم .. واسكعك
شلوت .. واكرتك بوكس .. واهبك .. اه .. بوكس برضه

م/8 لیل - داخلي

كاونتر الاستقبال

مصري يحاول وضع كيس الزباله فى الطفايه دون جدوى .. والموظف ينظر لباسبور مصرى

موظف

ده مينفعش .. حضرتك لازم تجيب الباسبور الامريكاني
اللى حجزت بيه من امريكا علشان كده الجنسيه مختلفه ..

مصرى يُخرج الكريدت كارد الامريكى

مصرى

ده كريدت بأسمى ومن امريكا

الموظف ينظر فى الكارت

موظف

لو كان عليه صوره كان ممكن .. بس ده مافهوش غير الاسم بس .. اسف

مصرى

طب خلاص ممكن تلغى او نحول الحجز اللى حجزته من امريكا واحجز بباسبورى المصرى

موظف

مينفعش حضرتك لاتلغى ولاتحول الحجز .. لازم هو اللى يلغيه

مصرى

هو مين ؟

موظف

استاذ مصرى سيد العربى .. امريكى الجنسيه
وحضرتك مصرى الجنسيه .. افرض استاذ مصرى جه فى اى وقت ..

موظف

صح معاك حق .. ممكن انا اجي فالافيك لغيتلى الحجز
فاتخايق معايا .. حضرتك انا هو هو نفس الشخص

موظف

سورى يافندم انتوا بالنسبه لى شخصين

مصري يضع يده على رأسه

مصرى

اوكى احجزلى اى غرفه لحد ما اشوف المشكله دى .. المهم انام

الموظف ينظر الى الكمبيوتر

موظف

انا اسف جدا والله .. مافيش والا غرفه فاضيه علشان الهاى سيزون والعرب وكده

مصرى

طب اعمل ايه دلوقتى .. انام فى الشارع

موظف

ممكن حضرتك تشوف فندق تانى ..

مصرى

يبقى عندى حجز ومدفوع مقدم واشوف فندق تانى .. جديده دى ..

مصرى يمشى

موظف

لو سمحت .. زبالة حضرتك

مصرى

اوكى .. بس لو انا جيت ابقى سلملى عليا .. انا مش مصدق

مصرى يشيل الكيس بعنف فيقع على الارض والنزلاء ينظرون له فيلم الزبالة ويضعها فى الكيس

م / 9 ليل - خارجي

خارج الفندق

راضي يسير خلف بعض الأجانب ويرى مصري خارج الاوتيل ومعه الشنطه وكيس الزباله فيجری عليه

راضي

أستاذ مصرى .. استاذ مصرى .. حقك عليا .. متزعلش .. احنا مصريين
زى بعض .. ولازم نقول للغلط لأ .. انت ايه الهوتيل طلع سكرته ؟

مصرى

حاجه زى كده .. يعنى ايه سكرته ؟

راضي

يعنى فى الهجايص

مصرى (بنرفزه)

اوكى قول كده .. فى الهجايص .. فندق هجايص

راضي

ولاتضايق نفسك .. انا تحت امرك .. اوديك اى فندق تاني وخلي
عنك خالص .. والمره دى مش عزومة مركبيه .. عنك الشنطه ..

راضي يشيل الشنطه ويضعها اخل الميكروباص

مصرى

انا تقولى وحياة امى لأوريك

راضي

هى دى اللى زعلتك .. يعنى يا صايع مزعلتكش

مصرى

لأ صايع اوكى .. انا صايع اوريدى .. والا مكنتش خفت منى .. شيل شيل ..

م / 10 ليل - خارجي

طريق مهجور

راضي يمسك مصري من تلابيبه وهو ساند على الميكرو باص ويهدده بعصايه

راضي (لمصري)
انا اخاف منك انت .. بقيت الفلوس بدل ما اموتك

مصري
بس كده اغتصاب .. بتغتصبنى يعنى !!

راضي
اطلع بفرق العمله

مصري
حاضر حاضر ..

مصري يُخرج من جيبه ميت جنيه

مصري
اتفضل .. اديتك ميه ودى ميه

راضي
كده متين جنيه فاضل تلتنيه

مصري
انت مش كنت عايز ميت دولار يعنى متين جنيه

راضي يُدرك انه ورط نفسه فى سعر الدولار

راضي
لأ ما هو عليّ وبقي بخمسه

قطع 10 A - الميكرو باص ينطلق ونرى مصري ينظر حوله فى المنطقه مهجوره وينادى على راضي

مصري (باستجداء)
يا أسطى راضى .. يا اسطي راضي

راضي (يتوقف)
التوصيله بخمسين دولار .. ؟

مصري
من ابو اتنين والا ابو خمسه

راضي
من ابو عشره .. علشان متصعش على امي تانى .. قولت ايه ؟

مصري (بصراخ)
بس مش هاندليك غير يا اسطي راضي يا حرامي

راضي (بتهديد)
مش ها تنادينى غير بحضرتك يا أستاذ راضي

مصري (بغضب عارم)
حضرتك يا أستاذ راضي !!! لا مع السلامة في داهية

قطع B.10 – نري الميكروباص من الخارج ثم نري راضي يقود ثم نري مصري بجوار راضي

مصري (بأدب جم)
هو الاوتيل اللي احنا رايجينه ده بعيد يااستاذ راضي

راضي
ابلع ريقك شويه بقه

مصري
حاضر حاضر ياراضي

راضي ينظر لمصري شظرا

راضي
راضي!! انزلك يعني

مصري
آسف...آسف يااستاذ راضي

xx راضي ينظر له شظرا بسبب عدم قوله يا استاذ ومصري يعمل نفسه نايم فحاءه

م / 11 ليل - خارجى

أمام الفندق

راضى متوقف قبل مطلع الفندق ومصرى يعطى راضى ورقه نقود نرى انها خمسين دولار .. راضى يضعها في جيبه ..
مصري يسرع في المغادرة

راضى

أنت ها تلون تانى ؟ دي خمسين جنيه ..

مصري (بنصاحه وخوف)

خمسين جنيه !! ان اصلا معيش فلوس مصرى

راضى ينظر لمصري بتهديد ويثبت النظرة منتظر ارد فعل مصري...مصري يتحول للخوف

مصري

سورى سوري .. اكيد انا اللي غلطان وكان معايه مصري ومخدتش بالي

مصري يعطى لراضى خمسين دولار

مصري (للميكروباص)

خمسين دولار وابقى غير ها انت براحتك ..

راضى يأخذ الفلوس ويمشى بالميكروباص ومصري يصعد المطع بالشنطه وباسبوره في يده

مصري (لراضى)

يا نصاب

الميكروباص يتوقف نري طفل يربط كلب بلدي بحبل ... الكلب يهوهو علي مصري الذي يتخض وينظر للكلب

مصري (للكلب)

مش انت مش انت

راضى (بتهديد)

بتقول حاجه ..

مصري (بخوف)

لا لا بقول للكلب

الكلب يهوهو على مصري ومصري يعمل بهينه كده وكده

مصري (للكلب)

كده وكده ..

راضى

للكلب !! ماشى .. هاتروح منى فين .. دى مصر كلها اوضه وصاله

مصري يصطدم بباب الفندق الزجاجى فيقع الكيس من يده وتتناثر الزباله

مصري (للكيس)

اصبر شويه هارميك حاضر .. ده انتى زباله زباله صحيح

م / 12 لیل - داخلي

فندق- استقبال

مصرى امام (شكرى) موظف الاستقبال

شكرى (بحفاره)

هو حضرتك سعودى ولا بحرینى ولا كويتى ولا قطرى ؟

مصري

نو .. أنا مصرى

شكرى (بقرف)

انا اسف مفیش ولا غرفه فاضیه

مصري

أرجوك مستعد أعمل أي حاجه عشان أنا .. **اعتبرني** يابانى .. اهو

مصرى يسحب عينه بأصابعه كاليابانيين

شكرى (بخياثه)

لا لو يابانى بقى .. **يبقى عندي ليك** سويت بريزيدنتال نيل فيو

مصرى (يبتسم)

شكرا .. بس على فكره انا كذبت عليك .. انا صينى مش يابانى

م / 13 نهار - داخلي

سويت في الفندق

نري كيس الزباله والشنطه كما هي مُغلقة .. مصرى يستيقظ بملابسه ويتمتع ويقوم من السرير

مصرى

نبدأ الشغل .. اااااااا ه وحشيني يامصر !!..

ويفتح الشباك فيرى حائطان لمبنيان ضخمان فى وجهه

مصرى

مصر راحت فين ؟

مصرى يلمح من بين حائطى المبنيان جزء صغير جدا من النيل

مصرى

ايه الى زنق النيل كده .. هو ده النيل فيو .. ده سيد فيو .. يالا

مصرى يدخل من البلكونه وقد استسلم للوقف فيرى كيس الزباله...مصري يحاول وضعه في الباسكت الصغير فلا يدخل...مصري يجلس علي السرير ويضع الكيس بجواره ثم ينظر له كأنه صديقه

مصرى (الكيس)

اطلبك فطار معايا

م / 14 نهار - داخلي

مكتب تأجير سيارات داخل الفندق

مصري مرتدى شرط وتسشيرت ويتوجه للموظف ومعه الكاميرا وزجاجة المياه المعدنية

مصري

I want to rent a car

الموظف (بانجليزية ركيكه)

idel pleaze

الموظف يُخرج استماره وقلم ويضعهم امام مصري الذى يخرج باسبوره المصري .. الموظف يرى الباسبور فيسحب الاستماره ويُخرج استماره اخرى ووصل

الموظف (بادب)

حضرتك مصرى فلازم تمضي ايصال علي بياض

مصرى

والاجانب بيمضوا ايصال على بياض برضه والا على صفار
علشان شعرهم اصفر .. انا عايز العربيه بالجى بى اس

الموظف

بالايله ؟

مصرى

جى بى اس .. الجهاز اللي انت بتدخل فيه العنوان ويطلعك خريطة
كده على الاسكرين فيها الشوارع والاتجاهات علشان توصل من غير ماتوه

الموظف

اه .. قصدك نافاجيتور اللي بتحط فيه العنوان اللي انت رايح عنده

مصرى

عنوان مين ؟ انا معرفش حد بالاسم ده .. انا عايز ارواح الهرم .. مش لعنوان ..

الموظف

يا استاذ العنوان يعنى العنوان

مصرى

طب ماتقول عنوان

نرى اسم الموظف المكتوب على يافته المكتب بالعربى "مازن منصور" مصرى يمضى

مصرى

على كده بقى حضرتك اسمك مازل ملصور .. والا الا غلطال .. عل اذلك ..

م / 15 نهار - خارجي

سيارة

السيارة فور باي فور فاخره ... مصري يضغط علي زر في الجي بس

مصري

طب اكتب ايه انا دلوقتى .. ميدال الجيزه والا
ميدان الجيزه .. هه .. الهرم .. ذا بيراميدز

صوت الجي بي اس

The pyramids...the pyramids

م / 16 نهار - خارجي

امام برج القاهرة

الكاميرا تنزل من برج الجزيرة على صوت الجي بي اس لنرى مصرى بجوار سيارته يقف ناظرا امام البرج

صوت الجي بس اس (مكرا)
The pyramids .. the pyramids

مصري
أسدا مين انا دلوقتي بأه .. ده الهرم .. معقول رفع كده ..
ايه عامل دايت .. طب اكتب الخرم جايز الهه بقت خه

مصري (لتمثال بجوار البرج)
وده ايه بقى .. ابو الهول

بنت (بشحاته)
ساعدنى الهى ربنا يسعدك .. انا معايش حق اللتمه .. معيش حق الهتمه .. اتفل يتيم

مصري
تاخدي خمسين جنيه بس بطلي تشحتى علشان كده نوتى

صوت الجي بس اس (مكرا)
The pyramids...the pyramids

مصري
بس بأه .. كفايه كذب

م / 16- نهار - خارجي

سيارة

مصري متوقف بجوار شخص يسأله .. الشارع مكسر وبه بلاعه مفتوحة

مصري
يعني امشي ازاي

الشخص

انا اقولك .. بص ياسيدي .. تسبب بلاعه زي دي اتنين تلاته وتقوم داخل شمال

الرجل يشير لبلاعه في الشارع

مصري
وان ماشوفنش بلاعات

الشخص

بلاش بلاعات .. مطب والتاني وتقوم داخل يمين

مصري
هو مفيش علامات غير المطبات والبلاعات ..

الشخص

لا ازاي فيه طبعا .. اكذب .. حفرة اتنين ...

قطع 16 B - مصري يتوقف أمام رجلان

الرجل 1

لالالا.. انت أيه اللي جابك كده .. أنت تمشي ستريت كده

مصري (بأستغراب)
ستريت!! أه straight

الرجل

ايوه ستريت في اول لو تيرن

مصري (مصححا)
لو تيرن .. يو تيرن

الرجل 2

انت باين عليك متعرفش انجليزي .. المهم في اول يمين في تاسع شمال

رجل 1

لا لا يا خليل .. تامن يمين في خامس شمال

خليل
طب بص بقي

مصري
شكرا خليل شكرا .. طب اعمل ايه دلوقتي ؟
انا اكتب برج القاهرة جايز يوديني الهرم

م / 17 نهار - خارجي

امام القلعه

مصري يقف بالسياره امام القلعه

مصري
مستحيل .. دى القلعه .. (بالقاف)

مصري يتوجه لشخص يمسه بيده كيس وعكاز باليد الاخرى نظن انه يتكأ عليها

مصري (للرجل)

لو سمحت هو الهرم ليه اسم تانى غير البرج والقلعه ؟

الرجل ينظر لمصري بنظرات زائغه ويبدو غريبا بعض الشيء

الرجل

بتقول ايه حضرتك مش فاهم ؟

مصري

انا عايز اروح الهرم .. امشى ازاي ؟

الرجل

انا ممكن اركب معاك واوصلك

مصري

توصلنى .. ياريت .. ده انا ابقى متشكر جدا .. اتفضل ..

ده انا تايهه بقالى ثلاث ساعات .. حضرتك جيتلى نجده من السما
ده انا سألت لحد دلوقتي ثلاثه وتوهونى .. ممكن تربط حزامك بس

الرجل يركب ويمد يده ويتحسس مكان الحزام فيدرك مصرى انه اعمى .. ويشير بيده امام عينه

مصرى (بأبتسامه)

انا اعتقد انهم بقوا اربعة .. انا بيتهيللى ندور على حد يوصلنا احنا الاتنين

الرجل

ماتخافش .. انا هاوصلك

م / 18 نهار - خارجي

شارع القريه الفرعونيّه

مصرى يقف بالسياره امام السور

الرجل

ايه الهدوء ده !

مصرى

انا قولت اتوهه فى حتة هاديه بدل الزحمه

الرجل

انت اكيد ممشيتش زى ماقولتلك .. طب
اوصف لى المنطقه الهاديه اللى احنا فيها دى

مصرى (ينظر حوله)

ليه هتاخذ شقه هنا .. فى شجر و عمايد نور وعريبات وفى واحد واقف مدينا
ضهره وبيتكلم مع السور .. ايه ده !! .. معقول يكون اللى انا شايفه ده حقيقى ..

الرجل

ايه فى ايه ؟

مصرى

الراجل اللى كان بيتكلم مع السور طلع بيعمل بببي عليه .. ازاي كده

الرجل

وهى دى علامه مميزه .. طب السور ده بتاع ايه ؟

مصرى (ناظرا للسور)

بتاع البببي اكيد .. لأ .. ده سور القريه الفرعونيّه

الرجل

حلو اوى .. عايزك تمسكه بقى

مصرى

امسك الراجل

الرجل

ياسيدى لأ .. امسك السور ده لحد اخره وبعدين
لف وارجع تانى وانزل بقى من تحت النفق

قطع 18A - نسمع فى راديو السياره اغنية (لوسألتك انت مصرى) لنانسى عجرم

مصرى

هى الناس اللى فى الاتوبيسات دى ليه بيبصولى

منصور

هما بيبصوا لكل اللى فى العريبات الواطيه مش
ليك انت بس .. اهم بيسالوا نفسهم على مايوصلوا

مصرى

هى اللى بتغنيلى دى مصريه ؟

الرجل

لأ كويتيه .. اسمها نانسى عجرم

مصرى

اصل باين من الاكسنت بتاعتها .. من لهجتها يعنى

الرجل

ماننت كمان باين عليك كويتى او سعودى .. صح

مصرى

لأ انا مصرى .. بس كنت عايش فى امريكا

الرجل(بانجليزية سليمة)

Well come its pleasure to meet u

انا اسمى منصور بشتغل فى الحسين (بالعربى) هاوريك شغلى ..

الرجل يُخرج عدة اطباق من النحاس المدقوق عليها رسومات .. ويتحسس الاطباق

الرجل

ده طبق اسمه (اسم الطبق) بياخدوه الالمان .. (جملة بالالمانى) .. وده طبق (اسم الطبق) بياخدوه
الفرنساويين (جملة بالفرنساوى) وده بقى طبق (اسم الطبق) بياخده الانجليز والامريكان واليابانيين

مصرى

والمصريين مايبخدوش حاجه !

منصور

لا .. الحاجات دى الاجانب بس اللى بيقدروها ..

نسمع صوت منادى فى الشارع

المنادى

طلبه طلبيه

منصور

خد بالك فى مطب

مصرى يأخذ المطب بكل سر عته وينظر للرجل

م / 19 نهار - خارجي

مطلع الهرم

مصري يتوقف على مطلع الهرم

الرجل

بس هنا .. اطلع المطلع ده تلاقى نفسك قدام ابو الهول

مصري

انا متشكر قوى .. بصراحه انا مش مصدق
اللى حصل ده .. طب انت هاترجع ازاي

الرجل

انا مش هارجع انا ساكن هنا ..

مصري

طب قول كده .. يعنى انا وصلتك

الرجل

وانا كمان وصلتك برضه .. متوهش تاني

مصري

لا خلاص حفظت .. لو عايز اروح البرج هاكتب الهرم .. ولو عايز اروح
القلعه هاكتب البرج .. ولو عايز اروح الهرم اتصل ببيك (او - اعدى عليك توديني)

م / 20 - 21 نهار - خارجي

الاسطيل - صحراء الهرم

مصري يسير في اتجاه رجل يرتدي جلباب وعنده احصنه ويقف مع سياح ويعطيهم الكارت الشخصى .. ونرى حلقه بها سايس يقوم بترقيص الحصان على انغام الطبله والمزمار والاجانب يتفرجون ويصورون

مصري (لصاحب الأحصنة)
عايز حصان لو سمحت

السايس
عينى يا ابن عمى

صاحب الأحصنة يعطى مصرى كارته ويلاحظ ان لكنة مصري شبه اجنبيه

السايس
هو حضرتك منين ؟

مصري
انا مصري .. مصريين زى بعض

السايس
تأمرنى يا ابن خالى

قطع 21 A - مصرى واضع الكاميرا على الاستاند والكادر مضبوط على زاويه جميله لأبو الهول ويبدو ان مصرى منتظر دقيقه بعينها للشمس .. وينظر فى ساعة يده وفى عدسة الشمس .. وتحين اللحظه الحاسمه لالتقاط الصوره فيقوم بظبط ال timer الخاص باللتقاط الصوره اتوماتيكيا ويدوس زرر الالتقاط .. وفجاءه يمر احد الصعايده يرتدى جلابيه وطاقيه يدخل الكادر وهو يتحدث فى الموبيل ومصرى يراه فينادى عليه

الفلاح
ايوه ياوهدان .. بورت الارض !!... كوردون مباني ان شاء الله

مصرى
يااستاذ .. اطلع بره

الرجل ينظر حوله ولايدرك يطلع بره فين .. ومصرى يشير له بيده

مصرى
لو سمحت اخرج بره الفريم بسرعه

الرجل لايفهم شيئا ويبتسم لمصرى والموبيل فى يده مرفوع فى الهواء وتلتقط الصوره فنراها عباره عن ابوالهول فى المؤخره والرجل فى المقدمه رافعا يده بالموبيل وكأنها موضوعه على اذن ابو الهول .. ومصرى متغاض

مصرى
حرام عليك بوظنت الصوره .. ده انا بقالى ساعه مستنى الشمس

الراجل
مستنى الشمس .. تحب اكلمهالك على المحمول

قطع 21 B - مصري ممسكا بالموبيل ويلف حول الحصان يتفحصه ثم يقف عند ذيله و الحصان ينظر للارض

مصري (في التليفون)
ده.. ايه كان نفسك تطلع حمار .. الو

قطع 20 A - صاحب الأحصنة ويرد في لاسطبل

السايس
الووو

قطع 21 C - مصرى يتحدث للسايس

مصرى
هو الحصان اللي معايا ده بيدور ازاى حضرتك ؟؟ انت مدينى موديل قديم اوى

السايس
هو الرهوان عملها معاك

مصرى
الرهوان مش عايز يتحرك .. تقريبا عايز كرسى بعجل .. وباصص فى الارض زى
مايكون بيدور على حاجه ضايعه وقعت منه

الحصان يتبول

مصرى
وتقريبا الريداتير اتخرم كمان اهو

السايس
هو عملها معاك يا ابن عمى ؟؟

مصرى
هو عملها عليا مش معايا .. هو اتجاه واحد

السايس
طب قوله .. يالا زيكو على البيت .. هاجرى عطول

مصرى
انا بتكلم جد حضرتك ..

السايس
وانا بتكلم جد .. قوله كده بس .. يالا يازيكو على البيت

مصرى
طب ماتقوله انت حضرتك .. اتفضل الحصان معاك .. مش ممكن اللى بيحصل ده

مصرى يضع السماعه على اذن الحصان وهو غير مصدق مايفعله وينظر حوله فيجد شخص ينظر له

مصرى (للحصان ثم للشخص)
يالا قول الو .. اصل باباه عايز يقوله حاجه .. ها ها

صوت السايس
يالا يازيكو على البيت ..

فجاء الحصان يجرى بسرعه فى اتجاه الاسطبل ومصرى يجرى وراه ولايلحقه

مصرى

استنى انا لسه مركبتش .. استنى .. انت هانجت والا ايه .. wait wait .. شى .. شى

الساييس

ايه اللى حصل يابن عمى ؟

مصرى

هو دار بس انا لسه مركبتش ياجوز خالتى

الساييس

معلش هو رهوان دايمما يعمل كده ؟

مصري

نصيحتي ليك ده تفسيره خالص وتجيبيه على الهيكل العظمى وبعدين انفخه من اول وجدديد

الساييس

افسيه .. طب تعالى مشي بقى

م / 22 ليل - خارجي

جامع محمد علي - القلعة

مصري بالشراب يصور القبه من الداخل .. نري رجال اجانب وبنات يضعون حجاب ابيض موحد .. نسمع صوت اقامة الصلاة .. الناس تصطف للصلاة ومعهم مصري .. ويقف بجواره كناس مرتدى اليونيفورم البرتقالي و عرقان للغاية وقدمه سوداء من القذارة .. مصري ينظر لقدم الكناس يقرف .. الرجل يحرك قدمه ويلزقها بجوار قدم مصري .. ومصري يتأفف ويبعد قدمه .. وكلما قربها من بعضها اقترب منه الكناس بقدمه ..

مصري

خد بالك .. حضرتك عمال تلزق صوابك في صوابي !!

الكناس

علشان الشيطان ميعديش من ما بينا

مصري يثشير من بين اسف قدمه

مصري

طب ماهو ممكن يعدى من هنا

قطع 22 A - مصري يخرج يبحث عن حذائه ولا يجده .. مصري يخرج معه **شيخ مصري** يبحثان عن حذائهما ولا يجدوهم .. ونري بعض القباقيب

الشيخ

مش لاقيتها .. عوضك علي الله بقى .. خد ده روح بيه

مصري

ده ايه ده ! رجل كنبه

الشيخ (بهزار)

ده قبقاب .. ايه مش عارف القبقاب .. متضربتش بيه وانت صغير

مصري يرتدى القبقاب ويسير خطوتين فيقع ويجد صوته على جدا

مصري

ده عامل دوشه رهيبه .. طب مافيش واحد هادى شويه

الشيخ

عادى .. هو صوته كده

قطع 22 B - مصري يرتدى القبقاب ويكمل تصوير خارج الجامع واتجاه الكاميرا عكس المسجد وفي اتجاه القاهرة .. نري ضابط وامين يلمحون كاميرة مصري الكبيرة فيتجهون نحوه بهجوم

صوت مصري

واو .. اميزينج

الامين يسمع تعليق مصري بالانجليزي فينظر للضابط متسانلا

الامين (لمصري بأدب وذوق)

اكسيكيوزمى لو سمحت .. وات اذ يور ناشونال .. قصدي حضرتك مين ؟

مصرى
ناشونال !! أنا مصرى

الامين يتحول للهجوم والقوة في الكلام

الامين
مصرى .. طب معاك تسريح ؟

مصرى يضع يده على شعره

مصرى
تسريح ايه ؟ انا شعري طول عمره كده ..

الظابط
انت هاتهنز .. تصریح .. تصریح تصوير

مصرى
تسريح .. لأ .. محدش قالى .. هم الناس دى معاهم تصریح .. سورى تسريح ؟

الظابط (بذوق)
دول بيصورا بعض ... القلعه .. انما حضرتك ماسك مدفع راكبله زوم ويا عالم بتصور ايه .. يالا يا حبيبي على البوكس .. لابسلى شورت وماسك قزازة ميه معدنيه ليه لما انت مصرى .. عامل تمويه .. قدامى ياخويا اما نشوف حكايتك ايه ؟

الامين يطوي الحامل ويأخذ كاميرة مصري ويسحبوه على البوكس

مصري
هوانا عملت ايه غلط ! طب فهمونى هي الشرطات اتمنعت

م / 23 ليل - داخلي

داخل البوكس

مصرى يراكب البوكس بالققباب فيجد بالداخل اثنين مجرمين واخرون فى البوكس

مصرى

انا مش مصدق اللى بيحصل ده ابدأ ابدأ ابدأ (بالانجليزى للمجرمين)
goodnight فى حد قاعد هنا .. ايه الريحه دى ؟

المجرم 1

ريحة ايه يا روح امك !!

مصرى

What

مجرم 1

وطى انت يا حبيبى .. انت شايبنى لايس شورت زيك .. اخرس خالص واترمى على البورش .. خد
يابلحه احذف البُرشامه ديه فى البلعوم علشان الطريحه اللى هانخدها جوه ..

مجرم 2

انا خايف اعترف

مجرم 1

لاااا .. انا عايزك حجر .. اجمد .. مهما **كيلوك** اوعى تقرأ أن ..

مجرم 1 ينظر لمصرى فيجده يستمع لهم وعلى وجهه ريكشن استغراب رهيب

مجرم 1

انت بتسمع ايه ؟

مصرى

والله العظيم ما فاهم والا كلمه

مجرم 1 (لمصرى ثم لمجرم 2)

طب خليك فى حالك .. فاهم يابلحه .. اوعى تعترف .. دى فيها اعدام يا ابن الدايخه .. حتي لو كهربوك و لاحظوا دماغك فى
الكنيف ... متضيعناش يابن الهايفه

مجرم 1

انا مش ابن هايفه

مصرى

لأ محترم

مصرى يمسك البلوشور ويقراء منه

مصرى

فى حالة تعرض احد المجرمين لك .. لاتلجأ الا لرجال الشرطه

مجرم 2

انت جاى تذاكر فى البوكس .. خلاص اللى ذاكر ذاكر

م / 24 ليل - داخلي

مكتب الضابط

الضابط امامه المجرمان وهناك عسكرى ومخبران (منعم والصاوى) منعم هو من يقوم بالضرب .. وصاوى بالامساك فقط .. ونرى ملامح منعم يبدو عليها الطيبة ولامح الصاوى يبدو عليها الشده .. ملامحهم عكس تصرفهم .. والمجرمين سيكون بشده وكأنهم مظلومين لدرجه التصديق .. ومصرى يقف بثقه مندهش من طريقة التعامل حتى لو كانوا مذبذبين .. منعم صاحب الملامح الطيبة هو من يقوم بالضرب

مجرم 2

يارب اعدم امى وابويا انا معملتش حاجه .. وربنا المعبود ياباشا

الضابط

مالكش دعوه بربنا ياله.. انتو اللي قاتلتيها فيه شهود وفيه ادله

مجرم 2

هو اكمننا غلابه ياباشا وملناش ضهر

الضابط

ده الحمد لله ان مالكوش ضهر .. كفايه علينا اللي ليهم ضهر.. خدهم فسحهم ياعسكرى

العسكرى ياخدهم وبمجرد ان يعطوا ظهروهم للضابط ينظرون لبعض ويضحكون واحدهم يغمز لمصرى

مصرى

يفسحهم ايه .. دول لازم يتعنمو .. ده انا سامعهم بنفسى فى الفور باى فور الزرقه اللي كنا راكبنها .. وهو بيقولوا او عي تعترف ان احنا اللي قاتلتيها

المجرمان ينظران لمصرى شزرا

الضابط

انت مستى ايه يادفعه .. بقولك فسحهم ..

الضابط

وانت ايه بقى حكايتك .. انت جاسوس ؟

فجاءه منعم يضربه على قفاه ... مصري يلتفت لمنعم ويلصق وجهه بوجه منعم بطريقة عراك الديوك الامريكان

مصرى

What the hill is goin on ...don't fuckin tough me again or I will kick ur ass
انت اجننت ازاي تعمل كده.. انت راجل مجنون .. انا عايز المدير انا هاوديكو كلكو في ستين داهيه

الضابط

ليه هو حضرتك مين

مصرى (بقوه)

انا مصري

الضابط

مصري وايه

مصرى (بقوه)

يعني ايه مصري وايه

الضابط

مصري وضابط!! مصري ووكيل نيابه!!
مصري (بقوه)
هومينفعش ابقى مصري وبس آخذ حقي

منعم يحرك يده ليهersh مصري يخاف ويلتفت لمنعم ليصبح ظهره للضابط

الضابط

انت يابنى

مصري لاينظر للضابط

مصري (بعصبيه)

استنى انت ..

فجاءه تنهال ضربه قلم على قفا مصري من الضابط فيقع فى حضن المخبر منعم

الضابط

لما اتكلم معاك تبصلى ..

مصري ينظر لوجوههم جميعا ليدرك طبيعة الموقف ويتحول للخوف

مصري

ما انا كنت هابصلك .. انت بتضرب ليه ؟ ..

الضابط

استنى يا منعم .. انت بتشتغل ايه ؟

مصري

بشتغل فوتوغرافر .. ومعايها الجنسيه الامريكيه

الضابط يتكهرب ويشير لمنعم بعدم الضرب

الضابط (بقلق)

جنسيه امريكيه !! .. طب ورينى بازبورك ؟

مصري

بازبورى مجبتوش معايها من هناك

الضابط يشير لمنعم بعينه ولكن مصري يمسه يده فيضربه منعم باليد اليسرى

مصري

انت اشول .. انا باسبورى في hotel

الضابط (بود)

اه .. الهوتل .. اجنبى قوى حضرتك .. انت مش قولت انه فى امريكا

مصري

باسبورى المصرى فى الاوتيل

الضابط

خلاص .. خد كلم اى حد تعرفه يجي يضمنك ؟

الضابط يحذف موبيل مصري له

الضابط

مش بعيد تكون سارق .. قرفص هناك كده واتكلم

مصري

اقرفص .. يعنى ايه ؟

الظابط

مش عايز استهبال ياله

مصري

I swear مش فاهم ..

الظابط (للمخبر)

قرفصه يامنعم على ما ادخل الحمام

قطع 24 A - مصري يتحدث في الموبيل وهو جالس القرفصاء في ركن المكتب

مصري

مين ؟ miss.. ام راضى .. انا client عند استاذ راضى ..
ايوووه زبون .. نايم .. طب ممكن تصحيه وقوليله ان انا ..

مصري

اللى انا فى ده اسمه ايه ؟

الصاوى

قولها انك معكوش فى القسم يابنى

مصري

معاكوش ايه !!

منعم يهم بضربه ولكن الصاوى يمنعه

الصاوى

ماخلاص يامنعم بقى .. انت ايه كافر .. شكله ابن ناس يا اخى

الصاوى (لمصري يفهمه)

قولها انك ممسوك فى قسم قصر النيل يابنى

مصري

قصر !! .. انا ممسوك فى قسم القصر بتاع النيل .. وعايز حد يضمن عليا ..

صوت ام راضى

يالهووى .. حالا يابنى اصحيه ويجيك .. واد ياراضى ..

مصري يغلق الخط

مصري (للصاوى بصديق)

انا معملتتش حاجه غلط .. انت عارف حضرتك لو دخلت على جوجل ايرث هاتشوف نفس الصور
اللى انا صورتها .. منشوره وواضحه على النت لكل الناس .. عادى .. طيب فيه فى هنا ويرلس صح ؟

الصاوى (بعدم فهم)

ويرلس بس .. ده فى بق كمان ؟

مصري (ناظرا له)

دى شيكه جديده فى مصر .. اوكى

الظابط (يدخل يغلق سوستة بنطلونه)

فسحه تحت بقى على مايبانله اصحاب

مصرى

استأذنك لو فى نت هنا ممكن ندخل على جوجل لحظه

الظابط

طبعاً طبعاً .. دخله جوجل يا منعم

م / 25 ليل - داخلي

الحبس

مصري يدخل الزنزانة فيجد المجرمان جالسان في انتظاره .. وينظرون له شزرا .. والزنزانة مليئة بالمجرمين .. ويتحفزون له ومصري يقرأ بسرعه من البلوشور

مصري

هو ده جوجل .. في حالة تعرض المجرمين لك ..

المجرمين ينظرون له بسبب كلمة مجرمين

مصري

في حالة تعرض المناضلين لك استخدم المماطلة والحيله او استعين
برجال البوليس طب وفي حالة تعرض البوليس ليا اعمل ايه ..

المجرمان يتقدمان من مصري وينهالون عليه ضرب ومصري يصرخ بالامريكانى

مصري

(كلام امريكانى)

الكادر فاضى على جردل ويدخل مصري الكادر بالبوكسر ومقدوفا على الحائط ثم ينزل مستقرا في الجردل .. المجرم 2
يدخل الكادر وراءه ويقترب من وجهه بشر

مجرم 2

انا عايزك بقى تعلمنى اللغة اللي كنت بترطن بيها دى

مصري

انجليش .. عايز تتعلم انجليزى !

مجرم 2

اى واحد فيهم

مصري

لا اختار .. انجلش والا انجليزى

مجرم 2

الاسهل

مصري

الانجلش اسهل بكثير من الانجليزى .. وفي لغة اسهل واسهل .. الانجليشى

مجرم 2

ماشى انجليشى .. قولى جملة اقولها وانا بضرب واحد
بالمطوه فى وشه .. احمس نفسى بيها كده زى الافلام

مصري

I lov u

مجرم 1

طب ولو عايز اقول لواحده بحبها انا بحبك اوى اوى اوى

م / 26 ليل - داخلي

مكتب الضابط

مصرى وجهه متشلفط وراضى ينظر له بتدقيق بطريقه تمثيلية

مصري

تخيلنى من غير الكدمات هاتعرفنى عطول .. بليز راضى

راضى (هامسا)

مش قلتلك مصر كلها اوضه وصاله .. الصراحة مش فاكركه ياباشا

مصري يعطيه فلوس

راضى

كده هافتكر نصك التحتانى بس .. وهما يهمهم
الفوقانى .. هات بقيت فلوسى علشان افتكر كلك

مصرى يعطيه زياده

مصري

خد .. بس على الله بعد ده كله القيك بتفتكرنى من ضهرى

راضى

تصدق فكره

مصري

وليه تتعب نفسك وتقعّد تشبه عليا من ضهرى .. خد .. اظن
كده وش وظهر كان المفروض يسموك واطى مش راضى

راضى (لمصري)

مين أستاذ مصري .. تسدأ اتغيرت خالص عن امبارح

الضابط (بذوق)

خلاص خلاص .. امسك حاجتك .. احنا مسحنا الصور

مصري (بعصبيه)

انت مش من حقاك تمسح الصور .. انت ازاي
تعمل كده !! انا مواطن مصرى وليه حقوق

الضابط

بيكلم مين ده ؟

راضى

بيكلمك انت ياباشا

راضى يخرج من المكتب بسرعه

الضابط

وانا ظابط مصرى واحنا الاتنين ببحكنا قانون مصرى .. والقانون ده بيدينى الحق انى
لما اشك فى حد اقبض عليه واتحرى عنه واتخذ لازم معاه ولو طلع مجرم انفخه

مصري

وادينى اتنفخت ومطلعتش مجرم .. هاتعمل ايه دلوقتى هاتفسينى ..
اتفضل فسى .. اتفضل .. مانفسى .. يالا ياراضى

م / 27 نهار - خارجى

الفندق

مصرى داخل الفندق حالة يرثى لها ومرتديا القبقاب ونسمع صوت طرقعه رهيب على الرخام وينظر له الناس

مصري (الناس بسخريه)
اكيد مش نازل من بيتنا كده

م / 28 ليل - داخلي

غرفة مصري بالفندق - امريكا - مكتب اداري

مصري يأخذ الغرفة ذهابا وايابا ومازال لابس القيقاب ويتحدث في الموبيل مع ماجي (الحوار بالانجليزى).. نري ماجي تجلس في وورك ستيشن في دور اداري به المئات من الموظفين...ماجى امامها كم كبير من الاوراق

مصري (بالانجليزى)

Magy please help me ..i am fucked up here (بالعربى - انا اتنفخت)

ماجى (بطبيه)

It was your choice to go to Egypt.. I have tans of work here

مصري

It was a mistake magy..please send me the American passport by fedex of dhl what ever... I .will finish my job here and leave immediatly..i cant step a move here without it

ماجى تفكر ثم بيدو انها وافقت...ماجى تنظر في النتيجة امامها

ماجى (متأففة)

Ok but I will send it after three days in the week end...how can I get it for u?

قطع 28 A نهار - ليل - مصري ذقنه طويله قليلا .. ومحتويات الغرفه غير مرتبه صوت خبط على الباب ويفتح بحرص .. نرى نادل يدفع عربيه المأكولات

العامل (بهدهوء وذوق)

فطار كل يوم حضرتك

مصري

الله حضرتك قولها تاني كده

النادل بيتسّم ثم يناول مصري ظرف عليه لوجو شركة بريد .. مصري يأخذه ويفتحه فيجده الباسبور الامريكى مصري يرقص مع الباسبور وحاطط الفوطه فى التيشيرت ويرقص مع الباسبور الامريكى...النادل يتعجب ويغادر...مصري يكمل رقصته لتنتهي عند السرير امام الباسبور المصري الاخضر...مصري يمسك بباسبوره المصري

مصري (للباسبور المصري)

انت

قطع م 28 B

مصري يفك حزام اللاب التوب المطاطي...مصري انتهي من تثبيت حزام اللاب توب في طرفي السرير ليصنع منجنيق...مصري يجرب وضع طفايه في الحزام ويطلقه داخل الغرفة...الطفايه تنطلق بقوة وتكسر زجاج الدولاب او المرآه العاديه...مصري يضع باسبور المصري في المنجنيق ويوجه ناحية الشباك او البلكونه المفتوحة...

مصري (للباسبور)

عالنيل فيو ياريس

مصري يطلق الباسبور الذي نراه يطير وورقه يفر وهو في الهواء

قطع C 28 نهاري - مصري مرتدى شورط وتيشيرت ويتحدث في الموبايل

مصري

يا راضى انا عايز اروح تحت كتير ومش عارف اسوق وكمان بتوهمه .. تعالى

صوت راضى

هاخد ميت دولار فى المشوار الواحد

م / 29 نهار - داخلي

اللوبى

مصرى امام موظف الاستقبال ومعه كل اغراضه ومنها شنته صغيره للمحفظة والباسبورات وكذلك شنته الكاميرا

مصرى (بسخرية و غيظ)
الغبلى حجز السويت اللي عامل نفسه ببطل على النيل

شكرى (بغلاسه)
ما هو ببص على النيل

مصرى
آه النيل وهو صغير..يا حرامي

شكرى (بغضب)
بلاش غلط يافندم

مصري يخرج باسبوره الامريكي ويدبه على الكاونتر وعينه في عين شكرى بتحدي..شكري يدرك كنه الباسبور

مصري
حرامي ولا مش حرامي

شكري
حرامي يافندم...

مصرى يتوجه لراضى المنتظر فى اللوبى

راضى (لمصرى)
ايه التأخير ده كله .. بقولك ايه .. ميت دولار فى المشوار علشان نبقى متفقين من الاول

مصري
طبعا طبعا .. ثانية واحدة .. وراجلك

مصري يتوجه لعمال الأمن ويريهم الباسبور ويهمس لهم بشئ .. وموظف الأمن يمسك راضى

راضى
فيه ايه ؟ يا مصرى .. انت يا جده ايه اللي انت عملته ده ؟

مصري
حضرتك بتنادى عليا .. انا مش فاكرك .. انت تعرفنى

راضى
بقى كده .. ماشى يامصرى

مصري
انا ممكن اقولهم يسبوك بس من هنا ورايح انا الاستاذ مصرى

راضى

استاذ مصرى !! شوف طريقك ..

م / 30 نهار - خارجى

بوابه الفندق

راضى يسير مع مصرى متأنكجين ونازلين من على مطلع الفندق

راضى

ميت دولار زى ما اتفقنا بقى يا استاذ مصرى يا حبيبى

مصرى

ماشى .. والدولار بخمسين قرش .. يعنى خمسين جنيه .. موافق

راضى ينظر له وهو لا يستطيع الكلام

مصرى

مالك ياراضى فى حاجه ؟

راضى

خلاص خليه ميت جنيه بس

مصرى

ماشى كلامك .. ميت جنيه يعنى بالدولار .. بيقوا .. خمسه دولار

راضى

ايه .. ما الدولار كان بجنيه من ثانيه

مصرى

اسكت .. مش نزل تانى ..

راضى يقف ووجهه يتجههم

مصرى

متزعش اوى كده .. انا هاديك اللى انت عايزه .. بس متنصبش عليا ..

راضى

اوكى .. ميت دولار

مصرى يرى الميكروباص راكن وبه اجانب

مصرى

مين دول ؟

راضى

زباين هانوصلهم فى السريع وسط البلد وابقى معاك زى ما انت عايز

مصري يركب وراضى ينطلق بالميكروباص...نري الولد صاحب الكلب الذي يربطه بحبل...الكلب يهوهو علي مصري الجالس بالامام مع راضى

مصري(لراضى)

وقف ثانيه

راضى يوقف الميكروباص

راضي
في ايه بس

الكلب يستمر في النباح علي مصري...مصري يخرج باسبوره الامريكي وبشهره في وجه الكلب...الكلب يتحول للصووة في لحظة

مصري(لصاحب الكلب)
هو الكلب ده نوعه ايه

صاحب الكلب
بلدي

مصري بيدي التفهم

م / 31 نهار - خارجي

شارع امام مبني حقوق الانسان

الطريق يسير بسرعه بطينه هناك مكان شاغر في الصف المجاور .. راضى يدوس بنزين فيكسر على السيارة المجاوره .. قائد السيارة المجاوره يضغط علي الكلاكس (بنغمة شتيمه) .. مصري يخرج يده بالباسبور الامريكي من الشباك ملوحا به .. صوت كلكس الرجل يعطى نغمة بحبك .. بحبك .. ومصري يغمز لراضى .. نري مظاهره علي رصيف امام مبني حقوق الانسان .. والمتظاهرين يقفون بظهورهم يرفعون لافتات لانري ماهو مكتوب عليها ... وعساكر الامن المركزي تنطوق المظاهرة .. سياره سوداء تفرمل في اخر لحظه وتصطدم بميكروباص راضى وهو واقف من الخلف .. ينزل راضى .. ونري ضابط يتحدث في الاسلكي (هو نفس ضابط القسم) ومعه المخبرين منعهم وصاوي ويقف بجواره (لواء) يذهب لمكان الحادث .. ومصري يراقب الموقف من داخل الميكروباص .. ونرى من ضمن الجماهير كناس مرتدى البدله البرتقالي

الضابط (لراضى)

رخصك

راضى

هو اللي خبطنى من ورا ياباشا انا كنت واقف .. هو اللي غلطان

الظابط

انا شفت .. هات رخصك بقولك

الظابط يتوجه للعربيه السوداء .. يُفتح الشباك ويتحدث من بداخلها في الخلف مع الظابط .. وبيتسم الظابط ويسلم عليه .. وتمشى المرسيدس .. والظابط يعود لراضى ويجد الاجانب بشعرهم الاصفر في الميكروباص

الظابط

مين اللي معاك دول ؟ مركب سياح .. اجره ومشغلها سياحه

مصري ينظر للضابط فيعرفه .. مصري ينزل للظابط وقد ترك شنطة الكاميرا واخذ شنطة الباسبورات والمحفظه

مصري (بتحدي)

لو سمحت .. هو مش غلطان

الظابط (لمصري)

انت تاني!! كن بدل ماتتخذ في الرجلين

مصري (ينظر للميكروباص)

دول اخواته .. واللى قاعد قدام ده باباه واللى جنبه دى ماماته .. بس (صايعين) (من اب وام تانيين) ..

راضى

انت ايه اللي نزلك .. اركب .. انا مش عايز حقى .. انا معروفش

مصري (لراضى بصوت عالي)

هاجيلك حقك علشان تعرف انى اجدع منك

الظابط(بسخرية)

تجيبه حقه ..انت فاكِر نفسك مين

مصرى

انا مصرى

الظابط

مصرى !! طظ .. معاك بطاقة ولا زي المره اللي فاتت

منعم يمسك مصري من قفاه

مصرى

معايا ده ..

مصرى يُخرج الباسبور الامريكانى ويشهره في وجه الضابط بتحدي

راضى

ايه ياعم بطاقة التموين اللى انت كل شويه تطلعتها دى !!

الظابط يُمسك الباسبور الامريكانى...الضابط يشير لمنعم ان ينزل يده من علي مصري

قطع 31 A - الباسبور الامريكانى الان فى يد اللواء ويقف امامه مصرى والظابط فقط ولاوجود لراضى

مصرى

انا عايز حق الراجل ده

مصرى يلتفت حوله فلا يجد راضى

اللواء

اذا كان صاحب الحق مش عايز حقه .. وهرب

مصرى

انا بقي هاجيبه حقه لحد عنده..يا اما نكلم السفير الامريكي وييجي هو يتفاهم معاكو

اللواء

انت بتهددنا يعني علشان حضرتك امريكاني !!

مصري

برافو..امريكاني وباسبوري حاميمني ومحدث يقدر يلمسني

العساكر يصطفوا بطريقه نظاميه ...

اللواء

طب ممكن تقول الكلمتين دول في الميكرفون
عشان العساكر مسمعوش ..عشان يخافوا منك

مصرى يأخذ الميك بيد و يشاهر باسبوره الامريكي في يده الاخرى

مصري (في الميكروفون)

انا امريڪاني وباسبوري حاميٽي ومحدث يقدر يلمني

اللواء يشير للعساكر فينصرفون ...العساكر ينصرفون

اللواء

شفت خافوا ازای

مصري الآن وحيد.. المتظاهرين يلتفون ناحية مصري بترقب .. فنري شعارات المظاهره ... امريكا الشيطان الاعظم ونري صوره بوش الاب بقرون وصورة بوش الابن يمسك بمدفع رشاش وصورته مشطوب عليها

مصري (في الميكروفون)

انا امريکاني وباسبوري حاميني ومحدث يقدر يلمسني..

المظاهره كلها الآن تقف خلف مصرى وهو لايشعر بهم وسط شاهرا باسبوره

قائد المظاهرة

هو حضرتك امريكاني؟؟

مصري (بتأكيد وتأخذه الحماسه اكثر)

وباسبوري حاميني ومحدث بقدر يلتمسني لانني امريكاني .. وهاذي اي حد بالجزمة .. فوقوا بقى .. اصرخوا .. ايوه كده اعملوا مظاهرات وعبروا عن رأيكم ومتخافوش

مصري يري الشعارات التي تندد بامريكا ... مصري ينزل الميك ويتفحص الوجوه الغاضبه ..مصري يستوعب الامر

مصري

احنا فى العراق ولا ايه ؟

قائد المظاهرة

حضرتك امریکانی باہ

مصري يشير لاسمه في الباسبور

مصري

انا باسبورى هو اللي امريكاني .. انما انا مصرى بص الاسم
(فى الميكرفون) انا مصرى وباسبورى مش حامينى واى حد يقدر يدينى بالجزمه
ده حتى اكثر اغنيه بجبها .. بتاعت نازلى عجرم اللي بتقول انا **مصرى وابويه مصرى** ... الخ

المتظاهرون

كمان مش حافظ الا غنية.. لااااااااا

فجأه قائد المظاهرة يرمي باسبور مصري علي الارض امامه

مصري

لوسمحت ..كده الباسيور ممكن يطبق حضرتك
قائد المظاهرة يركل الباسيور الامريكي يقدمه ليقع امام متظاهر آخر..مصري يذهب للباسيور ويوطى ليأخذه

مصري (المتظاهر 2)

ده كده الباسبور ممكن يتقطع حضرتك

المتظاهر 2 يركل باسبور مصري...مصري وجهه يحمر ويثور

مصري

What the hill...give me my fuckin passport

الصمت يخيم علي المتظاهرين.... المتظاهرين ينظرون لبعضهم...المتظاهرين سويا يهجمون علي مصري ليغلقوا عليه الدائرة

قطع B 31 نهاري - صمت يخيم علي المكان بعد صراخ مصري واصوات المتظاهرين .. ولانرى سوى الاوراق واللوح والشعارات ملقاه في الارض .. ونرى مصري يقوم من الارض مبهدل تماما ويبحث عن الباسبور ولا يجده ولا يجد المحفظة ايضا ويمشي مهموما .. ونرى الكناس الذي اعطاه مصري النقود يمسكك بمحفظة وباسبوره ويبحث عن مصري ولا يجده ويُخرج موبيله ويتصل براضى فيجد موبيله مغلق

م / 32 نهار - داخلي

لوبيي الفندق الثاني

مصري مبهدل يقف امام موظف الاستقبال (شكري) ويتحدث لمصري

مصري (بأدب)

ممکن امد الاقامه هنا حضرتك

شكري (بذوق شديد)

أوي أوي يافندم ونديك سويت نيل فيو بجد.. باسبور حضرتك بس

مصري ينظر يمينا ويسارا... لا يدري ماذا يفعل... ثم يشير للرجل ان يقترب منه كمن سيقول سرا

مصري (بهمس)

باسبوري ضاع

الموظف يعود لجلسته الطبيعيه يفكر

شكري (بصوت عالي)

باسبورك ضاع؟؟

مصري يومئ برأسه بالايجاب مبتسما منتظر رد فعل الموظف... الموظف يقترب لمصري من نفسه هذه المره

شكري (بخباثه بهمس مماثل لهمس مصري)

الامريكاني ولا المصري؟؟

مصري يقترب من الرجل

مصري (بهمس)

الامريكاني

الموظف يبدو عليه التفهم...

شكري (متفهما)

آه الامريكاني مفيش غير السويت اللي انت خدته قبل كده وسعره بأه بتلت اضعاف... ايدك علي الباسبور

مصري (بخوف)

باسبوري المصري برده ضاع

الموظف يقوم من جلسته منهيًا الحوار

شكري

سوري انا كده فعلا مش هاقدر اعملك حاجه .. مكنش عاجبك النيل وهو صغير

مصري

.. الهي ربنا يسعدك .. انا ماليش مكان انام فيه .. انا جعان ومعيش حق اللقمه مقطع ومعيش حق الهدمه .. اكفل يتيم .. الاوضه بتاعتي .. كنبه .. كرسى .. طفايه حتى .. انا كده هانام فى الشارع

شكري (بانتقام)

أسف

مصري (بزعيق)

ده انا لو الاستاذ مصرى اليهودى مش هاتعملوا معايا كده .. اااااا

شكري

احترم نفسك واتفضل لو سمحت من هنا

مصري

انا هاوديكوا فى داهيه

الامن يأتى ويمسكون مصرى ويطردوه

م / 33 عصر - خارجى

بجوار سفارة امريكا

مصري تائهه وشكله مبهدل ويرى بعض الناس ويهم بسؤالهم ولكنه يتردد ويخرج من جيبه ورقة التحذيرات التى اخذها من الطائره ويقراء فيها .. اذا ارت ان تسأل .. فسأل رجل الشرطه .. مصرى يتوجه لعسكرى شرطه

مصري (العسكري)

هى سفارة امريكا فين لو سمحت ؟

العسكري (بلهجة صعيدية)

عايز تروح السفارة ليه ؟ انت مين ؟

مصري (باستغراب)

انا مصري

العسكري (بلهجة صعيدية)

وطالما مصري عايز تسبب بلدك وتروح تغسل صحون في الغربة ليه .. ده حتى الغربه مره

مصري

هابقى اخد معايا سكر .. هو فى امر من اللى انا فى ده

العسكري

هى قفلت خلاص ياسكر ..

العسكري يشير لمصري ناحية السفارة

العسكري

بس لما تيجي هاتلاقي ناس ياما متذنبين ي طابور طويل..هي دي السفارة

مصرى يمشى مهموما

م / 34 ليل - داخلي

شوارع

مصري شكله شبه المجانين.. ويتصل براضى ونسمع ونرى ونسمع ان البطاريه ضعيفه .. وموبيل راضى يرن ولكن موبيل مصري يقطع شحن .. مصري يفتح الموبيل مره اخرى ويحفظ رقم راضى بسرعه

مصري

010347695

الموبيل يفصل شحن نهائيا

مصري

استتنى استتنى .. لسه رقم .. كان كام ..

يردد التسع ارقام فى سره بسرعه حتى لا ينساهم ويكتب التسع ارقام فى ورقه وتقف سياره وتعطى لمصري عشره جنيهه على انه شحات ومصري يمسك الفلوس بيده ويتحدث للسائق

مصري (السائق السياره)

انا مش شحتيت .. انا .. ممكن اعمل عشر مكالمات من موبيلك

السائق

انت عبيط باين عليك

مصري

طيب ماتكلمهولى ستين جنيهه اجيب واحد فول ..

السائق

انت عبيط فعلا

كناس يقف امام مصري يشحت منه

الكناس

ربنا يكرمك ويخليك يارب .. انا بس كان عليا ايجار الاوضه متاخر وكنت محتاج تلتنيه وخمسين جنيهه علشان ..

مصري

احمد ربنا ان عندك اوضه .. ممكن اعمل عشر مكالمات من موبيلك

الكناس

بقولك ايجار الاوضه تقولى موبيلك .. انت باين عليك اهيل

فوتومونتاج A 34 نهار وليل - مصري فى الشوارع يسير وحيدا ويجلس فى حديقته عامه ولكن رشاشات الميه تشتغل فيقوم .. ونراه وقد بداء الجوع يقرصه والنهار قد طلع .. ويرى الناس ياكلون على عربات الفول وامكن اخرى .. ويأى الليل وتزداد حالته سوء .. مصري يرى زبالين قد غادروا مكانهم على الرصيف تاركين ورق وبواقي اكل .. مصري يدخل الكادر وينظر فيجد الورق فارغ ولكن به بواقي اكل ولقم عيش

مصري

وسبيتوا الورق ليه ! ماتكلوه بالمره

مصري يمد يده فى الاكل ويأكل بشراهه وهو يبكى

م / 35 ليل - خارجى

كشك

مصرى امام كشك

مصرى

الميه بكام لو سمحت

الشاب

جنيه ونص

مصرى

يااه .. ارخص من الفول !! ممكن قزازة

مصرى يُعطى للشاب العشرة جنيه والشاب يضع لمصرى الزجاجه امامه .. ومصرى يرى يافطه على الكشك مكتوب عليها
(دقيقة المحمول بجنيه والميسد كول بنوص جنيه- نص بالواو)

مصرى

ممكن اكلم الرقم ده ..

الشاب يأخذ الورقه وينظر فيها

الشاب

النمره دى ناقصه رقم

مصرى

مظبوط ..

الشاب

كام الرقم اللى ناقص

مصرى

هو لو مطلعش واحد او اتنين او تلاته او اربعه او خمسه
او سته او سبعه او تمنيه او تسعه يبقى اكيد زيرو

الشاب

هاتجرب كل دول يعنى .. يعنى عشر مكالمات .. يعنى عشره جنيه

مصرى

بالظبط .. انا ماعيش غيرها ..

مصرى ينظر للعشره جنيه فى يده ثم للزجاجة الماء الموضوعه امامه

مصرى

اوكى .. ممكن عشره اتصال

الشاب

ولو اللى هاتكلمه رد من تانى والا تالت مكالمه .. هاتعمل ايه فى باقى المكالمات

مصرى

هابقى اخدهم تيك او اى ياسيدى

مصرى يمسك الموبيل الموضوع فى جراب ومربوط بسلسله فى الكشك ويستغرب

مصرى

اول مره اشوف واحد مربى موبيل .. انت ليه رابطه كده هو بيعض

شاب الكشك

ما هو لو كان بيعض مكش اتسرق تلت مرات قبل كده

مصرى

ولما هو مبيعضش ملبسه كامامه ليه

مصرى يفتح الاسبيكر

مصرى

اول رقم بيهو هو اهو.. قصدى بيرن .. اعمل ايه ادوس
على ودانه والا اشد يله .. ألو .. ممكن اكلم راضى لو سمحت

الصوت

محدث هنا اسمه راضى .. البقى اتأكد من الرقم اللى بتكلمه .. والا انت عبيط والا ايه ؟

الشاب يسحب الزجاجة قليلاً

صوت 2 (شباب روش)

راضى .. ابوها راضى وانا راضى ومالك انت بقى ومالنا ياراضى .. اقفل يا عبيط

الشاب يسحب الزجاجة قليلاً

صوت 3 (فتاه ملعب)

راضى !! طب مايتقش عبيط

الشاب يسحب الزجاجة قليلاً

صوت 4

ياللا يابن الجزمه

صوت 5 (صوت مميز)

راضى مين ؟ .. بطل معكسات يا ابن الك

مصرى يُغلق الخط بسرعه قبل مايتشتم .. ويطلب الرقم بالرقم التالى فيرد عليه نفس الشخص

صوت 6 (نفس صوت 5 المميز)

انت كمان معاك نمره مراتى يابن الكلب .. انتى ياوليه

صوت 7 (صوت طفل)

الو .. مين ؟

مصرى

اكلم راضى لو سمحت يا حبيبى

صوت 7 (صوت الطفل)

الو مين ؟

مصرى

ايوه يا حبيبى ممكن فى حد هنا اسمه راضى

صوت 7 (صوت طفل)

ايوه .. الو مين

قطع 35 A - راضي بجوار مصري

مصري (ببكاء)

انا اتمرمط يا اسطى راضى .. كل الناس قالت
عليا عبيط .. ساعدنى ابوس ايدك

مصري يرى يد راضى قنره فيبوس صدره

مصري

اهوه .. ابوس ايدك .. ابوس بطنك ساعدنى

مصري

انا عشت عيشة الشحاتين .. انا مش عارف هاعيش ازاي من غير باسبوري الامريكاني

راضي

عادي زى ماكل المصريين عايشين .. مش فاهم انا ..
لما انت مش اد المظاهرات بتطلع مظاهرات ليه ؟

مصري (ببكاء)

انا مطلعش .. ده هما اللي طلعا عليه ..

راضي

لاجل الرجوله اللي عملتها معايا مع الضابط .. مش ها اسبيك في ازمتك

مصري

مش هاتسبيني في جزمك ازاي

راضي (بخنقه)

اركب .. اركب

مصري (بشكوى)

ربنا يترمت تونيا واخرت

م / 36 ليل - خارجى

الىكروياص - السيده زينب

مصري يبدو عليه الهم

راضى

طب وانت عارف فين بيتكوا القديم ده والا هاتدوخنا ؟

مصري (متذكرا)

لأ طبعا عارف .. هنا فى القاهره

راضى

القاهره يمين والا شمال !

مصرى

هى المنطقه كانت على اسم راجل تقريبا اسمه سيدهم

راضى

سيدهم .. !! قصدك زينهم

مصرى

زينهم ايوه هو زينهم .. سيدهم ده ممثل باين .. ايوه سيدهم الشرقاوى

راضى

صح اخو عزه الكحلاوى .. بيتكوا فين فى زينهم .. مش فاكتر .. اي علامه

مصري (متذكرا)

آه .. كان فيه واحد بيعدي تحت البيت .. بيبيع فول

راضى

حراتي ولا مدمس ؟

مصري (بجدية)

انت يعنى بتمتحنى .. لأ طبعا مدمس .. وكان بيعدي كل يوم كمان

راضى (كانما وجدها)

طب ياراجل مش تقول .. بحسبه بيعدي يوم ويوم

مصري

.. وكان بيقول هوناااا جميع ابلية

راضى

اسكت اسكت .. نطلع على زينهم ونشوف

مصري

طب .. خش يمين

راضى يمشى شمال

مصرى

ايه ده .. حتى اليمين بقى شمال

الراديو يذيع اغنية (مشربتش من نيلها)

مصرى

اللى بتغنى دى كويته برضه ؟

راضى

دى البيت شرين يا اه يالليل .. م القلعه

مصرى (باقاف)

من القلعه !! .. هى القلعه ساكن فيها ناس ..
مع انى لما رحلتها كانوا سباح بس

م / 37 لیل - داخلي

شارع بجوار منزل مصري

راضي يقود مصري يبدو انه تذكر شيئا ما وينزل من الميكرباص ويتفحص المنزل عن قرب ثم يتحول للابتسام

مصري

اهو.. اهو بيتنا يا راضى

راضى

متأكد

مصرى (ناظرا حوله بسعاده)

الا متأكد انا انسى اى حاجه الا البيت اللى اتربيت فيه .. والشارع اللى لعبت فيه وانا صغير عماره سته شارع الازهار .. ياااااااااااااااااااا بيتنا ياااااااااااااااااااا

يمر احد الاشخاص ومصرى يسأله

مصرى

لو سمحت مش دى عماره سته ؟

الرجل

دى عماره تمنيه وخمسين

مصرى (لراضى)

ياه .. فى عشرين سنه زادت للدرجه دى .. طب مكنش سته قبل كده

الرجل

انت عايز شارع ايه ؟

مصرى

هو الشارع ده الى انا عايزه .. شارع الازهار

الرجل

ده شارع السكاكىنى مش الازهار

مصرى ينظر لراضى ثم للشارع

مصرى

ياااااااااااااااااااا مش شارعنا .. اتغير كثير

الرجل

شارع الازهار الناصيه الجايه .. لمين

مصرى

لمين ايه !! ليا انا .. انا اللى بسأل

راضى

متشكرين يا ريس .. يالا ياعم

مصرى

هو كان يقصد بـ لمين دى يعنى يممين !
حتى اليه بقت لام .. يالهووووى .. للا بيلا

م / 38 ليل - داخلي

امام باب الشقه

مصرى يقف امام باب الشقه وينظر للباب ثم لجرس الباب وهو مبتسم

مصرى (يتكهرب)
يااااااااااه .. الجرس يااااااااه

مصرى يمد يده ويضرب الجرس فيتكهرب

مصرى
اه .. الله يلعن ابو اللى عايز يفتكر ك ..

مصري يدفع الباب دفعتين برفق ... الباب ينخلع ويقع على الارض داخل الشقه ويحدث غبار رهيب

م / 39 ليل - داخلي

الصالة

المكان يخيم عليه الظلام الدامس ومصرى يكح من التراب .. مصري بالداخل يبحث عن النور ويفتحه ولاشئ يحدث...
مصري يتفحص المكان يمينا ويسارا وفجاءه تواتيه ضربه من الخلف على رأسه فيقع مغماً عليه

قطع 39 A - مصرى يفيق على كباية ميه تُسكب فى وجهه .. ونرى النور مضاء فى الشقه .. مصرى يري سعيد بالبيجامه
ومعه عصا غليظة وبجواره امه واخواته البنات وخطيب اخته وطفل مرتدى بيجامه .. والجيران ومصرى مربوط بحبل

مصري

انتوا مين !!

سعيد

احنا اللي مين يا حرامي.. انت اللي مين

مصري

انا مصري

سعيد يتوجه لمصري ويخنقه بالعصا

سعيد

انطق جاي تعمل ايه

مصري

انا مصري وصاحب الشقه دي .. مش دى شقه خمستاشر

سعيد يتذكر

سعيد (متذكرا)

مين مصري العربى ... معقول

مصري

ايوه انا

سعيد (بطيبه)

انا سعيد .. مش فاكروني .. انا سعيد .. طب سعه .. سعه يامصري

مصري

يااااااااه .. سعيد .. مش فاكرك

سعيد وهومتأثر يأخذ مصري بالحضن وهو مازال مربوط .. مصري عديم المشاعر

سعيد (لمصري)

واحشنى ... كده متسألش عن اخوك وشقك سعه ..
ولا لسه زعلان من آخر مره .. انا عارفك سّماوي

الجيران يغادرون

جار (يبدو عليه النوم بتريقه)

حمدالله علي السلامه ياسي مصري

ام سعيد (لمصري بطيبه)

ازيك ياد يامصرى .. انا ز علانه من امك اوي اوي
مكلمتنيش ولا مره من ساعه ماسافت .. هي اخبارها ايه ؟

مصري (باقتضاب)

ماما ماتت من سناسر سنه كده

ام سعيد

الله يرحمها .. طب ابوك اخباره ايه ؟

مصري (باقتضاب)

مات برضه

ام سعيد (بخوف)

الله يرحمه .. وخالتك عواطف برده ماتت ؟

مصري

لا عايشه في كندا

ام سعيد

طب مبيتكلمش ليه ؟

مصري

اصلها اتشلت .. ومبتكلمش .. بتشاور بس

سعيد

مش وقته بقى الكلام ده ياماما .. سيبوه بقى .. مصرى شكله
مرهق وراجع تعبان وعايز يريح .. انا هابات معاه

الطفل

وانا كمان .. انا عايز ابات معاكوا

ام سعيد

طب استنوا بس نص ساعه عندنا لحد ما انظفلكوا المكان

م / 40 ليل - داخلي

صالة سعيد

سعيد ومصرى يدخلون الشقه ونرى الشقه بسيطه ولكنها مريحه وتشعر وكأن الشمس لاتغيب عنها بسبب الشبابيك الكبيره والكثيره الموجوده بالشقه .. عدا شباك واحد مستطيل يُطل على منور كبير .. ونرى ان هناك بعض السجاجيد المبرومه والكرتين الخاصه بالصينى والكبيات .. الخ من لزوم جهاز البنات فى الصاله .. نرى ايناس اخت سعيد الصغرى عشرين سنه وبملايس المنزل .. وابتسام الكبرى خمسه وعشرين سنه ومرتديه ملايس منزل ايضا وجوارها خطيبها (عبد المنصف) .. شاب بسيط فى الثلاثون .. مصرى يدخل خلف سعيد

سعيد

تعالى ياميسو ادخل .. دى ياسيدى اختى نوسه .. ودى ابتسام .. فاكرهم

مصرى (بأحراج)

الحقيقه .. ايوه ايوه .. هاى

سعيد

ايوه ايه يا كداب .. دول اتولدوا وانت مسافر .. وده عبد المنصف خطيب ابتسام

عبد المنصف

جوزها ياسعيد .. جوزها

سعيد

بس لسه فى حكم المخطوبين

تدخل ام سعيد حامله اشياء من الشقه

ام سعيد

قومى يانوسه اقلى كام بيضه بالزبده وهاتى
الجبنه وقطعى طماطم وخيار .. تلاقى مصرى جعان

مصرى

نو نو .. انا كلت .. شكرا

ام سعيد

قومى يانوسه تلاقىه مكسوف .. و النبى يابتسام هاتى
ملايات نضيفه من جوه .. انت لسه دماغك بتوجعك من الضربه

مصرى

شويه .. هو حضرتك اللى ضربتيني

حموسه

لا انا ..

مصرى يضحك ويداعب حماسه فى شعره على انه طفل وكده

سعيد

انت بتضحك ليه ؟ هو اللى ضربك فعلا

مصرى مداعبا حماسه ويتصنع ان رأسه بتوجه .. وابتسام احضرت الملايات وتعطيها لامها فتتجه لشقة مصرى

سعيد

ده حمدى اخويا .. بس بنقوله حماسه .. ثانيه واحده اجبك حاجه تنام فيها

یدخل سعيد الى غرفته

مصرى

حماسه .. علشان كده وخداه الحماسه .. وافرضوا كنت حرامى فعلا .. ايه اللى
يخليكوا تعرضوا نفسكوا للخطر .. وكمان علشان حاجه مش بتاعتكوا ؟

عبد المنصف

الناس بيفرحوا اوى لما يمسكوا حرامى ..
.. سواء بقى كان بيسرقتنا والا بيسرق غيرنا

مصرى

بس ده اسمه تهور

يخرج سعيد من غرفته معه جلابيه زى جلابيب عدويه زمان

سعيد

معلش يامصرى لولا بس اخواتى البنات كنا بيتنا هنا .. خد البس دى نام فيها ..

مصرى

ايه دى ملايه ..

سعيد

دى جلابيه من بتوعى دى نضيفه .. انا لبستها مرتين بس

مصرى

بس .. شكراً انا كده كويس

م / 41 لیل - داخلی

غرفة مصرى

الغرفة نظيفة جدا .. والاطباق فارغة .. ونرى مصرى بالبوكسر ويقع من الشورط ورقة ماليه فئة 50 جنيه ..

مصری

ایہ الحظ ده ؟ کان ممکن اعمل خمسين مكالمه .. كنتي، فين ؟

سعيد

لسه مش فاکر نی یامصری؟

مصری

يعنى شويه .. الا اذا بقى كنت بتضحك عليا
وتكون انت كمان اتولدت بعد ما انا سافرت

سعيد

طَبَّ انت قاعد هنا كام يوم ؟

مصری (بہزار)

ليه ؟ هاتفضل معايا لحد ما افكر ك

سعيد

لأُصلي مش شايف معاك شنط ولا حاجه .. إقعد أقعد اما نتكلم شويه ..
ده انت واحسنى اوى يا اخى .. طب استنى انا هافكر ك ..

سعيد يعطى مصرى ظهره ويقوم باصدار صوت ریح من فمه بشكل مقزز ويضحك وحماسه يضحك بشده

مصری

ایہ القرف ده !

سعد

ایه مش فاکر ها .. ده انت کنت علطول هار بنا

مصری

انا انا انا انا انا .. انا لا يمكن انكون كنت بعمل كده

حماسه

طب اعمالها بس .. دی حلوه جدا .. (حماسه یفعلها بفمه مقلدا سعید)

مصری

بس یا حماسه انت .. عیب کده .. انا لایمکن اعمل کده .. انا عایز انام

سعيد

طب فاکر عجلتی الشوبر ام تلت سرعات الی كنت بغیظک بیها

مصري (بزھق)

مش فاکر ..

سعيد (بتأثر)

طب فاکر میرفت الی انا وانت کنا بنحبها

مصرى لايرد فيقوم سعيد بعمل صوت الريح بفمه فيخرج مصري رأسه من تحت البطانية مضجرا
مصري (بتسجيد)

افتكرت افكرت .. يااااااه ميرفت يااااااه ..
ناموا بقى ولا الـ (صوت الريح) اللى انت بتعمله ده

سعيد

بس او عی تګون ز علت من آخر حرکه عملتها معاك اودامها

مصري

بلیز انا عایز انام

حماسه

خلاص یاعم نام ده انت تقیل اوی

مصری

ايه الواد الرحم ده ؟

قطع 41 A ليل - سعيد نائم فوق اللحاف ونسمع صوت ديك .. مصري يفتح عينه فيجد حماسه في حضنه وسعيد يبشخر

مصری

میں دول !!

قطع 41 B - مصري يري تابلوه لتلاميذ في المدرسه يرتدون ملابس مدرسيه ومعهم الناظر

مصري

يااااااااااااه حضرة الناظر .. مكبرش خالص

صوره له مع امه

مصري (مبتسما)

یااااااااااااا ملما .. ایه .. همی کان اسمها ایه ؟ اه ... فادیه .. یاااااااااااا فادیه یااااا

فلاش باك C 41 نهار - سيارة والد مصري .. مصري يُصدر صوت ريح .. وابوه ينظرله بأستياء من الريحه...نسمع صوت جرس عجلة

الاب

افتح الشباك يا مصري .. مش معقول هريتنا .. متفطر هوش فول تاني ياناديه

مصري يفتح الشباك لنري سعيد مدمع العينين

سعيد (بتأثر من على العجله)

مهانش علیه تسافر وانت ز علان

مصري (بتأثر من الشباك بصياح حتى يسمعه سعيد)

انا مش زعلان.. اوعى انت اللي تكون زعلان

سعید (بیگم)

سلام یا مصری... سلام

سعيد هدى من سرعته لنراه مازال ينظر رافعا يده لمصري بالسلام بتأثر...سيارة والد مصري تبتعد ..مصري الصغير مازال ينظر من الشباك

عوده للحاضر

مصري

ناديه ! صح كانت ناديه قبل ماتبقى فاديه .. عيب اوى

مصري ينظر لصوره

فلاش باك 41 D نهار - نري العديد من الاطفال واقفون بعجلهم في دائره .. سعيد يقود عجله شوير وامامه مصري علي عجله .. سعيد يتوجه ناحية مصري ثم يفرمل بامريكاني قبل مصري بسنتيمتر والجميع يصفرون .. مصري يقوده عجلته علي العجله الخلفيه فقط .. الجميع يصفر لمصري اكثر من سعيد .. سعيد يسلم علي مصري بود وروح رياضيه .. عين مصري تصطدم بعين فتاه (ميرفت) ونفهم ان شيا بينهم .. سعيد يرمي العجله ويتوجه لمصري بغضب ويلبس مصري فانلته في رأسه ويدفعه ويأخذ جردل امرأه تمسح ويقلبه علي رأس مصري

سعيد

امشي يا جربوع

قطع 41 E - مصري يقلب الجردل علي وجه سعيد الذي يقوم مفزوعا من النوم

مصري (بغضب عارم)

انت الي جربوع وستين جربوع .. ازاي تهزاني كده قدام ميرفت

سعيد (بسعاده)

افتكرتني .. مانا بعد كده اعتنرتلك واتصالحنا لماعرفت انك مسافر

جريت وراك وقولتلك سلام يامصري وانت قولتلى سلام

ياسعده .. علشان ماهانش عليه تسافر وانت زعلان مني ..

مصري يتنكر ولا يريد ان يعترف

مصري

كذاب .. لازم انام .. انا لازم اروح السفاره بكره الساعة تمانيه يعني اصحي سبعة

سعيد

طب هاوصلك .. ماشي

مصري

ماشى رايح فين انت مش قولت هاتوصلنى ؟

سعيد ينظر له بعتاب معبرا ان مصري لم يفهمه

مصري

مواعيدك مظلوطه؟

سعيد(يتفقه)

سبعة بالقيمتو ثمانية هاكون تحت

م / 42 نهار - داخلي

الشارع

مصري امام الفيزبا ينظر في ساعته .. يأتي سعيد وحماسه ...

مصري (بقفش)

الساعة ثمانية ياسعيد واحنا معادنا سبعة

السعيد

اللي بيتأخر هنا عن معاده ساعه بيبقي مواعيده مضبوطة

تأتی سیده تخینه

ام سعيد

ياسعيد .. ياسعيعيييييييد .. والنبي يابنى البمبه فضيت

سعيد

ماشى يا ام فاروق ..

ام فاروق

يارب ينجيك من كل شر

بعض الاشخاص يصبَحون على سعيد

شخص

صباح الخير ياسعيد

سعيد

صباح الفل يابيسو اتفضل

مصری

یتفضل فین مافیش مکان واحنا و رانا میعاد

سعيد

یاعم لاهایتفضل والا حاجه ده ای کلام کده

مصری

اه .. عزومة مركبيه

الموتسيكل لا يدور فيحضر طوبه

سعید

ثانيه... ده الكتاوت

مصري

كتاوت!!..قصداك الـ cut out ..علميا اكيد الريالي مش في مكانه

الماكنه تدور بالطوبه

سعيد

علميا !!! مفيش حاجه هنا ماشيه بالورقه والقلم.. كله بالبركه

مصری

تلاته علی موتوسیگل ده مش قانونی ادا .. وبعدين

الطفل ده ممكن يقع كده .. تعالى فى النص يا حماسه

حماسه

اقع ايه .. خد بالك انت من نفسك

مصرى

ايوه الواد الجريء ده .. اطلع قدام فى النص

سعيد ينطلق بالموتوسيكل فيقع مصرى وهو محتضن حماسه فى حضنه وحماسه يضحك

مصرى

شوفتوا كان عندى حق انه كان ممكن يقع ازاي

م / 43 نهار - خارجي

جاردين سيتى وامام السفاره

سعيد ومصرى فقط على الفيزبا وسعيد يشير لقائد سياره بيده ان نور السيارة مضاء

مصرى

ماتركز فى السواقه بقى كفايه انك وقعتنى

سعيد

اصله لونزل من العربيه ونسي النور البطاريه تفضي

مصرى

ياسيدى وانت مالك !! هى يعنى بطارية موبيلك

سعيد

الناس لبعضيها برضك

مصرى

معلش .. برضك ركز فى السواقه

قطع 43 A - سعيد يتوقف بالموتيسكل عند السفاره

سعيد..

انا هاروح اغير البمبه لام فاروق واجيب حماسه تكون خلصت ..

مصري ينزل من علي الموتيسكل وسعيد يمشى

x

م / 44 نهار - داخلي

السفارة الأمريكية

X ومصري جالس وحيدا في صالون فاخر ويأتي شخص وقور يرتدي حله انيقه ويجلس في الكرسي بجوار مصري

الانيق

مستر مصري احنا هانبعث كل البيانات وبصمة
الايد والعين بتوع حضرتك وهنستنى الرد من هناك

مصري (يبتهج بالامريكانى)
والرد ممكن يوصل امتى ؟

الانيق (الانيق يهز راسه اسفا)
يعنى شهر وتعالى ..

مصري

شهر !!

الانيق

اصل الحقيقه دى اجراءات امنية مالهاش علاقه بالسفاره ..
وبقت بتاخذ وقت .. انت عارف بقى بعد حداثر سبتمبر الـ ..

مصري (مقاطعا)

طب اي وثيقه تقول ان مين امشي بيها علشان ماتنفخش تانى

الانيق

لو كان ينفع كنا عملنا كده وخرجنا لك باسبور .. الوثيقه زيها زى الباسبور

مصري

طيب انا حتى ماعيش فلوس اعيش بيها لحد الرد ما يوصل

الانيق

اول ما يثبت ان حضرتك معاك الجنسيه الامريكه .. القنصليه هاتحجز لك
تذاكر طيران درجه اولى وتديك خمس تلاف دولار وتردهم هناك
متر علش منى .. انا مافيش اى حاجه تثبت ان كل اللى قولته صحيح

مصري يصاب بالاحباط

جاردين سیتی

مصري وسعيد يسرون ... نري طابور السفارة الريب

سعيد

وهاتسافر ازاي

مصري

مش عارف اعمل ايه يا سعيد

سعيد يشير الى طابور السفارة

سعيد

عمري ماجيت السفارة دي ورجعت مجبور .. لا وكانهم بيصنفو الناس .. انت نضيف خد فيزا .. انت زباله متستحقهم تروح امريكا

مصري

الامريكان مبيغلطوش ووسواء اتقبلت او اترفضت فده اكيد لسبب علمي

سعيد يتجه الى جدار ويقف ليتبول

سعيد

طب انا اترفضت تلت مرات قبل كده؟

مصري (بجدية)

علشان .. انت زباله ياسعيد

سعيد ينظر لعين مصري محاولا معرفة اذا كان كلامه هزار ام جد ... سعيد حزينا يتوجه ليتبول .. مصري يحاول ان ينقذ الموقف

مصري

ايوه زباله ... ازاي تعمل كده .. ده انت منخط تفرق ايه انت عن الكلاب .. ده حتى الكلاب عندنا في امريكا صاحبها بيشيل البيبي بتاعها .. انت بقى مين اللى هالينصف وراك .. متشوف اي تواليت يا اخي

سعيد

محصور يا اخي وعازب اتصير اعمل ايه ...
ومفيش كنيف في الشارع .. واهوسقينا الزرع

مصري (ناظرا للشجرة)

قصدك جبته تسمم .. تفكر الشجرة دي دلوقتي ممكن تطرح ايه .. اكيد كاكيا ..

تنزل شخه عصفوره على مصري

مصري (ضاحكا)

والاو .. اهي طرحت .. مبسوط

يصلون الى الفيزبا فنجد عليها انبوبة غاز وحماسه

مصري (قاصدا الانبوبة)

ايه ده ؟

سعيد
دا حماسه

مصرى
انا بسأل على المدوره اللي جنبه دى ايه ؟ اخته

حماسه
دى بمبة ام فاروق احضنها جامد لحسن تقع وتفرقع فينا ونموت كلنا ..

سعيد ومصرى وحموسه والانبويه على الفيزبا ومصرى حاضن الانبويه .. سعيد ينطلق بالفيزبا فيقع مصرى وهو حاضن
الانبويه مثل وضعه مع حماسه فى السابق

مصرى
فين ايامك يا حماسه

م / 46 لیل - خارجی

قهوه بشارع المنزل

الفيزيا مړكونه امام القهوه ومصرى جالس على القهوه مع سعيد ويأتى صبي القهوه لمصرى

سعيد

مش انت من اب وام مصريين يبقي ممكن نطلعك باسبور مصرى من المجمع ... عارفه

مصري ينتبه لفكرة سعيد

مصري (بود)

فكره برده ... انا اسمع ان مصر مفيهاش غير تلت حاجات... النيل والناس والمجمع

الصبي

مجمع الا ماوفق .. تشرب ايه يا استاذنا

مصرى

فى مينيو ؟

الصبي (بسرعه شديده)

لا .. بس فى عناب .. كركاريه .. حلبه حصى .. شاي ميزه .. والقهاوى مانو زياده
مضبوط ساده قرفه بالجنزبيل معسل تمباك وقص وز غول وفى سحلب لوز باللين

مصرى

هه .. اخد لين .. دى الحاجه الوحيده اللى فهمتها

الصبي

لين ايه ؟

مصرى

هو فى الوان .. يالا نمشى من هنا ياسعيد

سعيد

اصبر بس .. هاتلى شاي ميزه .. وهاتلى شاي ساده

مصرى

بس لوسمحت السكر دايت

سعيد

بس يامصرى .. هاتله شاي فتله سكر بره ..

مصرى

انت هاتطلبلى على مزاجك .. انا بشرب الشاي بسكر دايت مش بسكر بره ..

سعيد يضحك ومصرى ينظر له

مصرى

وانت بتشتغل ايه علي كده سعيد ؟ بتاع بنمب

سعيد

انا عواطلي

مصري (يعتقد ان عواظلي وظيفة)
وكنت عايز تطلع عواظلي من وانت صغير

سعيد

لا .. هنا لو سألت المهندس كنت عايز تطلع ايه يقولك دكتور ولو سألت الدكتور
يقولك كنت عايز اطلع محامي .. محدش هنا بيطلع اللي هوه عايزه ..

مصري

وانت كنت عايز تطلع ايه ؟

سعيد

طيار .. مع اني ركبت الطياره مره واحده
واترعبت و عملت نفسي كاني بتخفق بموت

سعيد يمثل انه كان يتخفق مع عمل بعض التشنجات..مصري يضحك علي أداء سعيد

مصري

بس انت كده مشلول مش مخنوق

سعيد

المهم نزلوني الحمد لله قبل الطياره ما تطلع

مصري

حركات مصريين ... طب واشمعي كنت عايز تطلع طيار ؟

راضى

عشان الطيارين المصريين احسن طيارين في العالم

مصري

مع احترامي للطيارين المصريين بس الناس في مصر معيشه
نفسها في خرافات .. الطفل المصري أنكي طفل في العالم ...

مصرى ينظر الى حماسه الذى يلعب كوره بحجر فى الشارع

مصرى

يابنى دى مسكنات بيقولها الناس لنفسهم عشان يحسوا أنهم ناجحين
في أي حاجه .. اهو .. حماسه .. دى تصرفات انكى اطفال فى العالم ..

سعيد

يااه ده انت قافش أوي

مصري (بضيق)

وانا هاقفش على حماسه ليه يعنى .. قافش !! يعنى ايه قافش ؟

سعيد

مضايق يعنى من البلد

مصرى

انا كنت ناوى ارجع واستقر واعيش هنا .. بس اتاكدت انه قرار غلط ..

صبي القهوة (أتياً بالطلبات)
سيادتك عايز الفتله والا اشيلها

مصري
اتفضل .. لفهالي هاخذها معايا

X
يدخل عليهم رجل كبير في السن

هلال
ازيك ياسعيد

سعيد
اهلا يا عم هلال .. عارف مين ده ؟

هلال
ده .. انت مصري العربي .. صح .. ازيك يامصري
انا عمك هلال ياد مش فاكركني

سعيد
افتكره بدل مايفضحك

عم هلال
.. انا عم هلال يالا انا اللي طاهرتك يلا

سعيد يضحك... مصري لايفهم

مصري (لسعيد ولكنه امريكيه)
ايه طاهرتك دي ؟؟

سعيد يهمس في اذنه ثم يمثل له الكلمة... سعيد يضع اصبع علي الترابيزة ثم ياخذ معلقه ويحركها بظهرها كأنها سكين نحو
اصبعه كأنما سيقطعه.. سعيد ينزل المعلقة لتصدر صوت علي الترابيزة ويبعد اصبعه في آخر لحظة

سعيد (متشجعا متألما)
وآه ه ه

عم هلال (لمصري)
ايه العمليه كان فيها مشاكل ولا ايه .. يالا انا رايح الاستوديو .. سلاموا عليكوا

مصري
يعرفني منين الراجل الغريب ده

سعيد
ازاي مش فاكركه .. عم هلال ساكن معانا في العمارة

مصري
ده منظر دكتور

سعيد
عم هلال عنده استوديو تصوير كبير اوى في التحرير .. مصوراتي زيك

سعيد يمثل مشهد الطهور ومصري يضحك ويرفع يده لسعيد بطريفة give me five ... سعيد لايفهم

مصرى (بزھق)
ياسعيد باھ .. خلاص خلاص

م / 47 ليل - داخلي

بلكونه مصري

سعيد ومصري يقفون في البلكونه ومصري بالبوكسر يضع الكوفرتة على اكتافه ويلمح في بلكونة سعيد ان ابتسام بتتخاف مع جوزها عبد المنصف

سعيد
عطول بيتخانقوا كده

مصري
طب مايطلقوا

سعيد
مش لما يتجوزا الاول ..دول خطوبه اربع سنين..وبعدين منصف جاب شقه اسكان شباب كتبوا الكتاب..ولسه لهم سنتين
عقبال مايشطب الشقه وهي زهقت ...وكل ماالخطوبه بتزيد المشاكل بتزيد

مصري يفكر

مصري
طب ايه رأيك لما اسافر يتجوزو في شقتي

سعيد(متحمسا)
تبقي حركه مجدعه منك...واخلي منصف يدفع لك ايجار كمان

مصري
حلو آخذ منهم ايجار قول ...الفين جنيه ..بزنس اذ بزنس

سعيد(يسخريه متفهما ان امله تبدد)
الفين جنيه!!! لا ربنا يوقعهم في شقتهم

مصري
آذ يو لايك ..وانت ماتجوزتش ليه انت وميرفت؟؟

سعيد
أتجوز مين ياعم .. انا اصلى مكملتش وخذت الدبلوم
وهي بقى بقت مدرسه موسيقى في مدرستنا

مصري
طب وايه المشكله .. اوحشت يعنى لما بقت مدرسه

سعيد
انت اصلك مش عايش في مصر .. ميرفت لايمكن تفكر فيا .. العلام بيحب العلام

مصري
يعنى انت فكرت وقررت انها لايمكن تبصلك من غير حتى ماتقولها ..

سعيد يشير برأسه بالايجاب حزينا

سعيد
قولى .. انت مابقتش تحبها

مصري (بضحك)

انت عبيط .. انا مش فاكرك انت .. هافتكرها هي

سعيد

صحيح انت معاك فلوس عشان الفيزا ..

مصري

فلوس الفيزا .. هي بكام اصلا؟

سعيد

ستميت جنيه .. لومعايه مكنتش اعزهم عنك والله .. طب منبيع الكاميرا بتاعتك

سعيد يوجه يده للكاميرا .. مصري يمسك بالكاميرا قبل ان تصل اليها يد سعيد

مصري

متلمسهاش .. دى داد جايبهالى قبل مايموت

سعيد يستغرب تصرف مصري

سعيد

خلاص تشتغل

مصري

اشتغل ايه؟؟ .. انت بقالك ثلاثين سنه ومش عارف تشتغل ..
يبقى انا اللي مكملتش شهر هاعرف .. هو فيه حد هنا اصلا بيقدر فن التصوير ؟

مصري يضع الكامير علي عينه ويجرب ان يصور...يكشف ان الكامير لاتعمل...مصري يفك زرار الباور ويضعه ثانية ولكن
الكاميرا لاتعمل

مصري(بغضب)

انت لعبت في الكاميرا ياسعيد

سعيد

والله مالمستها .. طب وريني كده الزرار اشغلهولك

سعيد يمد يده ليري الكاميرا ليحاول الاصلاح...مصري يبعد الكاميرا عن يد سعيد

سعيد

ياعم هاشوف بس

مصري يري سعيد الزرار والكاميرا في يد مصري...سعيد ينفخ فيه نفختين متتاليتين

مصري(بسخره لسعيد)

ياسلام كده هاتتصلح

مصري يجرب الكامير لنري عدسة الزوم تخرج للخارج معلنه عمل الكاميرا...مصري ينظر لسعيد باستغراب .. ام سعيد تدخل
ومعها نوسه.. شايله صينييه عليها اكل وام سعيد شايله ملابس مصرى

ايناس

العشا جاهز ياسعيد

ام سعيد

هدومك اهي يامصري اتغسلوا واتكوى

مصري

شكرا يا ام سعيد اوى

م / 48 نهار - خارجى

شارع مصرى

نرى سعيد ومصرى وحماسه على الفيزبا .. وام عبير تجرى ومعها عبير وهى فتاه فى السادسه من عمرها بأىشارب وزى مدرسه

سعيد (لسيده تجرى)
خير يا ام عبير بتجرى ليه ؟

ام عبير
كويس انى لحقتك .. ميكروباص المدرسه
فات البت .. والنبي خدها معاك

سعيد
تعالى يا عبير

مصرى
ودى هاتركب فين ؟

م / 49 نهار - خارجى

امام المدرسه

الفيزيا تتوقف امام المدرسه وينزل حماسه وعبير

عبير (مصرى)

شكرا ياعم سعيد .. شكرا يا عمو مصرى

مصرى

هى ليه قالتلك يا عم وانا قالتلى ياعمو

سعيد

علشان عم دى بتنتقال للناس الى قريبين من بعض .. انما عمو دى بتنتقال للغرب

مصرى

عم دى بتنتقال للبقالين

سعيد

بقالين ايه ؟ ما انا بقول كده لعم هلال .. يا عم هلال

مصرى

يعنى وهو هلال ده سفير المانيا .. ده شيخ البقالين

سعيد

طب ادخل اشوف ميرفت لحظه

مصرى

معلش المره الجايه شوفها .. يالا علشان منتأخرش بقى

سعيد

انت قلقان ليه .. يابني الباسبور بيطلع في خمس دقائق

X

م / 50 نهار - داخلي

مكتب - مركز اصدار البطاقات

زحام وحشود من المواطنين .. وهو يشير لسعيد بيده علامه خمس دقائق

مصرى

خمس دقائق .. صح ..

قطع 50 A - نرى مصرى بالفانله الداخليه .. ويشد قميصه او تيشيرته من احد الشخصا المعصوريين فى الزحام

مصرى

ده قميصى حضرتك سيب ..

الرجل
امال قميصى انا فين ؟

مصرى يرى قميص الرجل محشور فى الزحام فيشير للرجل عليه

مصرى
شوفه جايز فى الدولاب او فى الغساله .. قميصك اهو ياسيدى .. الحق نط هاتله لحسن ده بيغطس

الرجل
والنبي هاته هاته انت اقرب

مصرى
اقرب ايه .. قول بقى انك مبتعرفش تعوم ..

مصرى يسد مناخير ه ويغطس ويمسك القميص

مصرى
اتفضل .. ابقى خد بالك بقى المره الجايه .. او ابقى البس قميص بيعرف يعوم

قطع 50 B - مصرى امام شباك الاستثمارات

مصرى
عايز استماره رقم قومى لو سمحت

الموظف
عادى والا مستعجل

مصرى
مستعجل جدا

الموظف
سبعين جنيه

مصرى (للموظف)
خليها عادى .. او خليها بكره واشترىها مستعجل .. يالا ياسعيد

م / 51 ليل - خارجى

امام منزل سعيد

الفيزبا عطلانه وسعيد يحاول اصلاحها وبجواره مصرى

مصري
والناس اللي احنا رايعين لهم دول بيقترو الفن ياسعيد

سعيد
آخر تقدير

مصرى
مش راضيه تشتغل ؟

سعيد

حرنت

مصرى

حرنت !! .. وجايه تعمل كده فى اول يوم شغل .. هانعمل ايه ؟

سعيد

اتوبيس الشعب

مصرى

طب قولى الفرخ اللى هاصوره فى فندق ايه ؟

سعيد

فى فندق الشعب

م / 52 ليل - خارجي

موقف اتوبيس

مصرى شايلى الكاميرا والعهه وبجواره سعيد وحماسه ويجرون للحاق بالاتوبيس ، مصرى خلفه سعيد ثم حماسه

مصرى

طيب هى الاتوبيسات هنا المفروض نجرى وراها كده لحد المكان
اللى احنا رايعنله .. وبعدين ده زحمه جدا .. انا مش راكب

فجاءه مصرى يُصدر صوت ريح فيتوقف الثلاثه

سعيد

ياه اخيرا عملتها .. اهلا بيبك فى وطنك

مصرى

عملت ايه .. الصوت ده يعنى .. لأ مش انا .. اشمعنى انا ..
ماممكن يكون اى حد من اللى بيجروا

سعيد

لا انت هو انا هاتوه عنها

مصرى

غصب عنى والله .. الفول اصله اشتغل ..
ومع الحر والجرى كمان .. الدنيا اترجت جوه

سعيد

لو فى واحده تانيه عايزك تحوشها

مصرى

احوشها .. ليه هاتنفع فى وقت عوزه

سعيد

الله ينور عليك

مصرى

دء بدل ماتقولى الله يقر فك

م / 53 ليل - خارجي

الاتوبيس

مصرى يبدو عليه انه ماسك نفسه ومش قادر

مصرى

هااه .. اضرب دلوقتى والا لسه .. هامووت .. كده هاتطلع من بقى

سعيد

ياللا .. واحد اتنين تلاته اضرب ..

حماسه واقف خلف مصرى

مصرى

شيل اخوك لينفرتك ده قدام المخرج بالطبط ..

سعيد يشيل حماسه

سعيد

هااه فين ؟

مصرى

حصل .. بس سايلنت

نرى ريكشانات للركاب بسبب الريحه

قطع 53 A - الاتوبيس لا يوجد به سوى الثلاثه وراكب لا يبدو عليه اى ريكشن .. وحماسه ماسك مناخيريه ويضحك

مصرى

مش كنت عايزنى اعملها .. ده انا هاعميك

حماسه

كفايه بقى يامصرى حرام عليك

مصرى

لسه فى واحد فى الاتوبيس منزلش .. لازم ينزل

مصرى ينظر للرجل والرجل ينظر له وكأنه بيجمع لاطلاق صاروخ .. وفجاءه يمسك الثلاثه انوفهم

مصرى

الريحه دى مش تبعى

الرجل

ما انا ساكتلك من الصبح بقى

مصرى

وصلنا ولا لسه ياسعيد

سعيد

ياللا وصلنا .. نط نط

يقفز الثلاثه من الاتوبيس .. والوحيد الذى يقع هو مصرى .. ونرى الاتوبيس يترنح يمينا ويسارا فى الطريق

م / 54 ليل - خارجي

فرح شعبي في الشارع

نري صوان فرح ونسمع موسيقي شعبيه ونري معازيم سوقين ... مصري وسعيد واقفين قبل الفرح بخطوات ... سعيد يجذب مصري... مصري يحاول الابتعاد

مصري

انا لا يمكن انزل بمستوايا الفني الي المستوي ده

سعيد يمسك بمصري

سعيد

يا عم اي سبويه عشان الكاشات

مصري

لا يمكن انا فنان

سعيد

يوم وهابعدني عشان فلوس الفيزا

مصري ينصاع لكلام سعيد عندما يسمع كلمة الفيزا

م / 54 B- ليل - خارجي

فرح شعبي

مصري وسعيد الان داخل الفرح امام الكوشة... نري مصور آخر ... يبدو انه مصور افراح شعبيه محترف.. يصور صوره وكاميرته معدوله ثم يدير الكاميرا تسعين درجه ويستعد للتصوير وفمه مفتوح عن آخره لنري اسنانه بوضوح بابتسامه مزيفة

المصور (بتملق للعروسين وبعض الاقارب)
الضحكة الحلوة بأه

المصور يلتقط الصوره

المصور

الله جميله... هايله

يصطف بعض المعازيم الآخرين ويبقي من المعازيم رجل عريض يبدو ان نو قرابه قويه بالعريس.... سعيد يشير للمعازيم ان ينظرو علي كاميرة مصري

سعيد

هنا

الجميع يلتفتون لكاميرة مصري الذي يضعها علي عينه... الجميع مبتسم للتصوير... مصري ينزل الكامير ويوجه احد المعازيم...

مصري

ورا شويه حضرتك عشان ضلك بس طالع... هومينفعش نعلي الاضاءه شويه

شخص مايدخل الي اليمين... مصري يضع الكاميرا علي عينه ثانية... الجميع مبتسمون... مصري ينزل الكاميرا ثانية

مصري (لأحد المعازيم)

يمين سنه عشان الاكسبوزيشن بس

..في نفس اللحظة المصور الآخر يصور نفس معازيم مصري

المصور

ايوه الضحكة الحلوه... قمرات.. قمرات

مصري يضع الكاميرا علي عينه ثم ينزلها

مصري (لنفس الشخص)

جيت يمين اوي... سنه شمال..

المعازيم بيبدو عليهم الضيق...

العريض قريب العريس (بغضب)

ايه ياسعيد اللي انت جاييهولنا ده... والله لوما انجز هابطحه و

سعيد يصعد للكوشه ويقبل رأس قريب العريس ثم ينزل لمصري

سعيد (لمصري)

اخلى.. الحساب بالصوره... ولسه مخدتش ولا صوره

مصري

ده فن ياسعيد

سعيد

دي سبويه يا حبيبي... شوف البيه شغال ازاي وعمل زيه

نري المصور الآخر يصور ويقلب الكاميرا قبل التصوير بجزء من الثانية.. مصري يتفهم ويتوجه للكوشه وهو فاشخ فمه
مثل المصور الآخر

مصري(للمعازيم والعرسين يتملق)

الضحكه الحلوة

مصري يقلب كاميرته مقل بطريقه مبالغ فيها اكثر مما كان يفعل المصور الآخر

م / 55 نهار - داخلي

المجمع

مصري مكشور ويقف امام موظف ومعه استماره

سعيد

فك التكشير ده علشان يخلصوك .. لازم تبين انك حابب
الناس والمكان علشان ميفتكروش انك بتتنطط عليهم

مصري

بقى انا كده اللي بطنطط عليهم .. يعنى ايه بطنطط عليهم دى !

قطع 55 A - مصري وسط الزحام والعرق محشور فى باط واحد تخين عرقان جدا.. مصري مبتسم

مصري

مش قادر مش قادر .. انا بحاول اضحك بس باطه جابلى اكتباب .. fukun باط

مصري يقع علي مكتب الموظف (خليل) من كثر التدافع ونراه ببشر عرق من كل حته

خليل

ايه العرق ده ؟

مصري

ده مش عرقى ده كان عرق الى قدامى .. بس جميل وريحته حلوه اوى .. انا مليت الاستماره الخرافيه دى ..
الوانها تحفه .. وهاموت .. هاموووت اطلع رقم قومى علشان عندى امنيه اعمل باسبور مصرى .. واوواه ..
سعيد ملئ الاستماره المستعجله وانا عايز اطلع بطاقه رقم قومى علشان عايز استخرج باسبور مستعجل لو سمحت

خليل (بقتامه)

فين البطاقه الورق .. شهادة الميلاد اى اثبات شخصيه ..

مصري

مانا جاى اطلعهم علشان بحبهم اوى .. وبحب المكان وبحبكوا كلكوا .. بحبكوا .. ثانك يو

خليل

كمل ورقك وتعالى .. وعايزين صورتين اربعه فى سته وتكون ودانك باينه فيهم .. للى بعده

مصرى (لسعيد)
وانا هاتصور فين دلوقتى ؟

سعيد
عم هلال بقى

مصرى
بقولك اتصور مش اطاهر سعيد

م / 56 نهار - داخلي

ستوديو تصوير هلال

مصرى يقف امام المراءه فى الاستوديو .. والاستوديو متر فى متر .. ومصرى وماسك ودانه ومخرجهم لبره

مصرى (لسعيد)

كبير اوى الاستوديو ده .. مفكرتش ليه عمله مول او سينما

هلال

انت بتتنور .. حمار تك العراجة ياسيدى ..

هلال

سرح شعرك .. الفرشه عندك ..

مصرى

طبعا اكيد زاحم الاستوديو وهو منكوش كده

مصرى يرى الفرشه قنره فيرميها فى الباسكت

م / 57 ليل - خارجى

امام برج القاهرة

مصري امام كاميرته التي وضعها علي حامل .ومعه سعيد مع كامير كالتى يستخدمها المصورين السريعة ومعهم حماسه ..
مصرى يصور سيدتين توءم ومعهم رجل ...

مصري (سعيد)
بص .. اضبط الفوكس وثبت ايدك

سعيد
فلوكس ايه

سعيد يقترب ليفهم ما يقوله مصري فيمسك بكاميرة مصري...مصري يضرب سعيد علي يده..

مصري (بهمس غاضب)
انا اوريك علي دي وانت صور باللي معاك دي...انت عارف دي بكام

مصري يقصد بدي الاول كاميرته ويقصد كاميرة سعيد بدي الثانية

مصري (للزباين)
...انا جاهز يا جماعة ..جاهزين؟

الرجل
صور

مصري يضع عنيه علي الكامير ثم يكتشف شيئا

مصري
طب بس ممكن المدام اللي على اليمين تبدل مع اللي على الشمال

السيدات يبدلن الاماكن ولا فرق فكهلن نفس الشكل

مصري
كده احسن كثير

مصري يصور

مصري
على ماتطلعوا البرج وتنزلوا الصور هاتبقي جاهزه

مصري يعطى كارت الميمرى لسعيد الذى ينطلق بالفيزبا

م / 58 ليل - داخلي

ستوديو هلال

سعيد مع هلال فى الاستوديو يستخرجوا الصور من البرنتر الصغير ويبدو ان عم هلال تعبانا

م / 59 نهار - داخلي

الجميع

مصري ينظر للزحام من حوله

مصري (بهذوء)

عايز اطلع الرقم القومى .. ودى الاستثمار ودى الصور بالودان والمناخير وكله

سيد (بضحك)

عنيه ياباشا .. طب فين الشاي الاول

مصري (لسيد)

شاي .. كام معلقة سكر

سيد

خمسة معالق في عشره

مصري (باستغراب)

خمسه في عشرين .. ميت معلقة سكر .. ليه حصان !

سعيد (بغضب)

يا عم حظله اللي هو عايزه

مصري ينادى على صبي الشاي ويأخذ منه كبابه ويضع السكر في كوب الشاي ... سيد ينظر لمصري شزرا .. مصري يظن ان كمية السكر لا تعجب سيد فيضع من السكرية مباشرة في الكوب مصري لا يفهم .. ينظر لسعيد

مصري (لسعيد بهمس)

انا بيتهيألى انه موضوع الشاي ده يعنى يبقى عايز فلوس ؟؟

سعيد (بهمس بنكاء)

لا لا ده شكله مبياخودش .. انا اعرف اللي بياخدو من اول نظره

مصري (بصوت عالي)

صدقنى شكله عايز رشوه ..

الجميع يلتفتون ومصري يضع الشاي امام سيد

سيد

ايه ده ؟ شاي ! انا عايز ميت جنينه رشوه

مصري ينظر لسعيد بغضب .. سعيد ينظر لمصري ثم الناحية الاخرى كمن لايري مايحدث

مصري (بشك)

والرشوه دى رسوم كله بيدفعها ؟

سعيد

قصده بما يرضى الله يعنى

سيد (رامياً الورق)

انا شغلي من الاول بما لا يرضي الله .. اخلصك بما لا يرضي .. ولا تقف في الطوابير سنه بما يرضي الله

مصري ينظر لطابور طويل جدا

مصري

خليها بكره اكون جبتلك فلوس الرشوه .. يالا ياسعيد

م / 61 نهار - داخلي

المجمع

مصرى وسعيد يقفون امام موظف كبير فى السن وخلفهم الزحام

الموظف

فين القيد العائلى

مصرى

مافيش .. انا اصلى عايز اعمل رقم قومى وجبت فلوس الرشوه

الموظف بزببة صلاه

الموظف

لولا انك اد ابنى انا كان ليه تصرف تاني معاك ..

مصرى

طيب فين الاستاذ اللي بياخد رشوه هنا

الموظف

رشوه ايه يا ابن الكلب .. غور ..

مصرى وسعيد يجريان

مصرى (لسعيد بغضب)

انت اقدم منى فى البلاد دى .. كان لازم تمنعنى ..
اعمل ايه دلوقتى .. تعالى نجرب مجمع تانى

قطع 61 A - نري موظفه تجلس علي مكتب ووتعطي ورقه لمصري الذي يجلس بجواره سعيد

الموظفه

عايزين اتنين ضامين علشان القيد العائلى

مصري

اوكى انا وسعيد .. تضمني ياسعيد

سعيد يخرج بطاقته ولايرد علي مصري كانما مصري ارتكب جرما ويهم بالتوقيع

سعيد (للموظفه)

امضي فين ؟

الموظفه

استنى يااستاذ .. انت وسعيد ايه ؟

مصري

انا وسعيد واحد مافيش مشكله ..

الموظفه

ياسيدى ربنا يسعدكوا .. عايزين واحد غيرك

مصری
واحد غیری بطلع البطاقه ؟

واحد غیری یطلع البطاقه ؟

الموظفه

یانهار اسود .. واحد غيرك يمضى مع اسمه ايه ده .. سعيد

قُطْع 61 B - نرى سعيد وراضى يمضيان الموظفة تناول مصري بطاقة سعيد وراضى فينظر فيهم فيري سعيد وراضى فى البطاقة فاتحين فهم ببلاهه

مصري

شكلك اهل في الصورة ياسعيد

سعيد (بسعاده)

المصريين كلهم صور بطايقهم كده .. العسكري اللي بيصور بياخذ الصورة على سهوه مبتلحش تتضبط .. ده ممكن يصورك بققاك عادي

مصري (ضاحکا)

ليه هو عسكري واحد بيبصو مصر كلها .. بلاش حجج

راضی ينظر في بطاقة سعيد ويتقحص الصورة فيزيد ضحكه

مصری

بتضحك على ايه .. ده انت شكلك اهيل منه

راضی بنظر لمصری شزرا فیکتم الضحک

مصری

بس علی وسیم

بِضَحْکُونِ جَمِيعًا

راضی

ابقي وريني صورتك انت هاتبقى عامله ازاي

مصري

[illegible]

م/74 نهار - داخلي

غرفة مصري

مصري مرتدي ملابس ويبدو انه يشم رائحة كريهة في الغرفة .. فيفتح الشباك فتزيد الرائحة .. نرى جلابية سعيد مازالت موضوعه في مكانها .. سعيد نائما وحماسه غير موجود بالغرفة ومصري يوقظ سعيد

مصري

سعيد .. سعيد في ريحه وحشه قوى .. انت شامم ..

سعيد

اه .. كل سنه وانت طيب النهارده شم النسيم

مصري

يعني هانروح المجمع ولا لا

سعيد

لا المجمع قافل النهارده

مصري يعاود القرف من الرائحة

مصري

شم النسيم !! نسيم ايه ده اللي ريحته كده

سعيد

نسيم الفسيخ ..

مصري

فسيخ !! انا شكيت الاول في انه حماسه بس الريحه دى اكبر منى ومنك ومن حماسه

سعيد

امي جايالك شوية فسيخ فله .. وهانروح الجنينه ونديها .. وهات الكامرا معاك ..

مصري

اسمها كاميرا ياسعيد كاميرا .. مش كامرا

سعيد ينادى على حماسه

سعيد

يالالاااااااا يا حماسه

مصري

هو فين ؟

سعيد

في الحمام

مصري

راح علينا شم النسيم

تدخل ام سعيد عليهم وهي مرتديه ملابسها

ام سعيد

ياسعيد .. يامصرى .. ايه كل ده نوم .. يالا ياتنبل انت وهو ..
احنا هانسبق على هناك ياسعيد .. متنساش تجيب العيش

م / 75 نهار - خارجى

الشارع

سعيد ينطلق بالموتسيكل ومصرى وحماسه وعبير خلفه ومصرى يحمل على رأسه قفص العيش عليه عيش

م / 76 نهار - داخلي

جزيره فى النيل

نرى بها اجانب يعيشون فى بيوت على النيل مباشرة .. ونرى اسرة سعيد ومعهم عبد المنصف ومصرى وعم هلال وفيفيان
يفترشون الارض وامامهم فسيخ وبصل وليمون وسفن اب ... الخ .. مصري متأفف يمسك انفه قرفا ..

مصرى

ده باظ ياجماعه .. انتوا مكننوش حاطينه فى التلاجه .. مش ده
الفسخ اللي بيقولو عليه انا زى الفسخ محبش شريك !

فيفيان

التانى ده الفريك ..

مصرى

ايوووووه الفريك .. انا زى الشريك محبش فريك .. وبيتعمل ازاي الفسخ ده !

سعيد

ده سمك بيتساب لما يدود ويعفن ويعدين يـ ..

ام سعيد (مقاطعه)

بعد الاكل ياسعيد ..

قطع 76 A - مصري يضع مشبك غسيل على انفه وينظر للفسخ .. الجميع يأكلون .. ومصرى ينظر للفسخ وهو جعان
يأتى راجل اجنبى

الرجل

عندكوا رغيغ زياده لو سمحتوا

هلال يعطي للرجل عيش بزياده

مصرى

تعرفه ده ياعم هلال

هلال

ولا عمرى شفته .. الخواجات اللي قدامك دول عايشين
هنا من خمستاشر سنه .. جم يزورا مصر ومن ساعتها مرجعوش

مصرى

اكيد يا باسبوراتهم ضاعت يا اما انت خاطفهم

هلال

لا .. شافوا حاجه للاسف كثير منا مش شايفينها

x

ام سعيد تصنع ساندوتش عباره عن ربع رغيغ من الفسخ وتضع عليه الكثير من اليمون ثم تتاوله اياه

ام سعيد (بطيبه)

جرب .. عشان خاطرى

مصري

طب مافيش كلور ولاديتول احطه علي البتاع ده

سعيد

في لمون

مصري ياخذ لمونه ويمعن في عصرها علي الساندوتش ثم يشم ثانيه بقرف اقل من ذي قبل ... مصري يقرب الساندوتش من فمه .. الجميع يشاهدون .. ينظر للساندوتش قليلا ثم بخوف يضعه في فمه ولايقطع ... مصري يخرج الساندوتش من فمه لنري الساندوتش كما هو

مصري

الحمد لله شيعت

حماسه

كل بقى ومتيقاش فرفور

مصري

انا مش فرفور .. فاهم .. مش فرفور .. يعني ايه فرفور بقى

حماسه

يعنى مدلع

مصري يقطم من الساندوتش وهو مغمض العينين .. مصري يعضغ في بطئ وترقب وخوف.. مصري يبلع ببطئ نسمع صوت بلعه ثم يتحول للابتسام ويبدو ان الفسيخ اعجبه .. فيفيان تعطيه بصل ويأكله .. الجميع ياكلون ومعهم مصري بدون صوت نشعر انهم اسره واحده .. ولكن سعيد متضايق من خبر عريس ميرفت

قطع 76 B - الجميع قد قاموا وبقي مصري امامه طبق ملئ بهياكل السمك وسعيد يأتي له بعد ان غسل يديه

هلال

ماتيليا بقى يابنى عايزين نلحق نرجع

مصري

الحمد لله .. ازاي ريحته وحشه وطعمه حلو كده .. اه كنت خايف بطنى توجعنى

هلال

لا الفسيخ مفهوش وجع بطن .. ياتموت يا مفيش

مصري (لحموسه)

علشان تعرف بس انى مش فرفور

مصري يمسك زجاجة الماء

سعيد (محذرا)

دى مية حنفيه

مصري

لااا خلاص بقى .. انتى مسمعتيش الاغنية اللى بتقول مشربتش من نيلها بتاعت .. نفين اه ياليل

سعيد (تصب له فى الكبايه)

اسمها شرين .. اشرب .. بيقولك اللي يشرب من مية النيل لازم يرجعها تاني

م / 77 ليل - داخلي

حمام منزل مصري

مصري يتقيأ في الحمام وسعيد وامه والبنات واقفون خارج الحمام وحماسه ميت على روحه من الضحك ... مصري يخرج
يمسك بطنه متألماً

مصري (بغيط)
كده برضه ياشرين .. ماشي

ام سعيد
انت برضه ثقلت جامد يابني

مصري
مش من الفسيخ .. ده اكيد من الميه

سعيد
لا لا .. ده اكيد من الفسيخ .. ميه الحنفية مابتتعيش بطن المصريين

مصري (بسخرية)
ليه بتشوف بطايقتهم الاول؟؟ آه يابطني

فجأه مصري تأوه تأوه شديد ويمسك بطنه ويغمى عليه ويلحقه سعيد ونرى رأس مصري بين يدي سعيد

مصري
ا ه .. ااه .. انا مش فرفور يا حماسه .. مش فرفور

م / 78 ليل - داخلي

غرفة مصري

ام سعيد تدخل بطبق تتصاعد منه الابخرة ومصرى بجواره حماسه ويفيق ويرى عم هلال امامه وسعيد متضايق

مصرى

لا انا مش هاطاهر مرتين .. ايه ده ؟

عم هلال

مش العملية اللي انا عملتها لك تمام ... يبقى اشرب وانت ساكت

مصري

لا لا ..

ام سعيد

امسكه يا حماسه

حماسه ينقض على يد مصرى

مصري

ايه يا عم الفسيخه انت .. بالراحه

مصرى يحاول ان يتملص

مصري

حاسب بقولك .. ايه الواد الناشف ده ! او عى بقى يا حماسه بلاش هيل

حماسه

اتهد بقى .. علشان لما اقول انك فرفور تبقى تسمع الكلام

مصري

خلاص ياعم انا مش فرفور واحد .. انا فرافير كتير .. سيب بقى انا لايمكن اكل
ميه او اشرب فسيخ تانى .. عجبكوا كده الفسيخ جابلى انفصام فى الشخصيه

عم هلال

اي اكل او ميه فى العالم بيبقى فيها بكتريا .. واهل البلد بيحصلهم
مناعه منها .. وشويه شويه لما تبقى مصري بجد هاتأخذ المناعة دي... **سداني**
لوجبنا ساندوتش هامبورج من امريكا واكله واحد مصري هايجيله تسمم

مصري

سداني انت .. ده الساندوتش هو اللي هايجيلوا تسمم

هلال يسقي مصري رشفه اخري

مصري

مممكن جنيه ونص اجيب ازاوة ميه لحسن انا عطشان اوى

هلال يعطى مصري اتنين جنيه .. هلال يخرج ومعه ام سعيد ومصرى يعطى لحماسه الاتنين جنيه

مصري

خد يا حماسه هاتلى قرازة ميه من الكشك اللي فى اخر الشارع ..

حماسه
ماتشرب من الحنفية

مصري
الحنفية لأ لأ .. انت مش شايف اللي جوالى ..

حماسه
حاضر

م / 79 ليل - داخلي

مطبخ مصري

حماسه يملء زجاجة مياه معدنيه قديمه فى المطبخ من الحنفيه وهو يتلفت حوله حتى لا يراه مصرى

م / 80 ليل - داخلي

غرفة مصري

مصري يشرب على بق واحد

مصري (يشرب بشراهه)
يااااه .. هي دي الميه مش تقولى مية الحنفية .. شكرا حماسه

حماسه
على فكره دي مية حنفية

مصري
كذاب طبعا انت فاكرنى عبيط .. انا اعرف افرق ميه الحنفية من بين ميت ميه

مصري ينام فورا

حماسه (ناظر له)
حمار
x

م / 63 نهار - داخلي

مكتب اصدار الوثائق

مصري يقدم شهادة القيد العائلي للموظف

مصري

وادی شهادة القيد العائلي اللى بتثبت انى وحيد

الموظف يأخذ شهادة مصري

عباس (برخامه)

فين المؤهل الدراسي؟؟

مصري

انا معايا ماجستير من جامعة كاليفورنيا ستيت يونيفرسيتي

عباس يرمي ورق مصري في وجهه

عباس

عايز شهاده مختومه ختم النسر انك بتعرف تقري وتكتب

مصري

بقولك ماسترز من ...

عباس (مقاطعا بحسم كمن يعرف ماذا يقول)

شهاده مختومه ختم النسر انك بتعرف تقري وتكتب

مصري يمتعض

مصري (لسعيد)

وهاجيب الشهاده دي منين ياسعيد

سعيد

الابتدائية ... الاعداديه..اي حاجه

م / 46 نهار - خارجى

الشارع-امريكا شاطيء

مصرى جالس على الرصيف وحوله راضى وسعيد

مصرى
مافيش حل غير انى اكلم ماجى

راضى
ماجى مين ده ؟

مصرى
ماجى مين ده !! ماجى اللى بيحطوها على الشوربه

مصرى (بالامريكاني)
Magy can u go to california state university to get my certificate..i really need it here
ماجي
I am five hours driving away from new yourk in a ten days vacation
مصري
Magy please
ماجي
When I come back I will do it for u

م / 65 نهار - داخلي

باب مدرسه

مصري وحماسه وسعيد على الفيزيا وينزلون ..ومصري ومعه زجاجة المياه التي لاتفارقه ابدا

حماسه

هاتمشى بعد كده والا هاتستناني

سعيد

هاستناك ادخل بقى

مصري

بقى انا معايا ماجستير من جامعة كاليفورنيا ستيت
يونيفرسيتي واجى ادور على شهادة الابتدائيه .. هزلت

سعيد

ان شاء الله هاتفرج ..

مصري

مش باين .. وشكلى هافضل كده لا انا عارف ابقى مصري ولا امريكانى

سعيد

كل ده خير خير

مصري

انا مش عارف انت جايب التفاضل ده منين .. غريب

سعيد

انا غريب

مصري

ديقتك غريب ..اوكى حقير

م / 66 نهار - داخلي

كريدور فصل

مصري وسعيد في الكريدور

سعيد

استنى هنا اما اشوف حضرة الناظر فين ؟

سعيد يمشى ومصري يعبر بجوار فصل شبابه مفتوح .. نري بداخله مُدرسه هي فيفيان الجميلة البرينه التي ترتدي ملابس بسيطة ذات ذوق فلاحى هي جيبه وبلوزه باكمام

فيفيان (الطلبة برقه)

لما احب اقول لحد شكرا اقله ايه ؟ Thank you very much

ميرفت تنطق كلمة very بالفاء وليس بالـ v .. مصري يسمع الكلمة فيتوقف

مصري (لنفسه)

ايه !! فري ماتش

مصري يدخل رأسه من الشباك

مصري (للتلاميذ)

اسمها very much انتي بتعلميهم غلط !

مصري يدخل الفصل سريعا

فيفيان

انت مين حضرتك عشان تقتحم الفصل كده

مصري يكتب علي السبوره (فيبريشن)

مصري (للتلاميذ)

الكلمه دى اسمها ايه

التلاميذ يرفعون ايديهم ومن بينهم عبير

فيفيان (بطبيه)

نزل ايدىكو يا اولاد محدش يجاوب

عبير (بالفاء)

اسمها فيبريشن

مصري (لميرفت بسخرية)

فيبريشن .. فيبريشن .. ده لو واحد من الولاد دول سافر وبره وقال فيبريشن لحد ممكن يقبضوا عليه ويرحلوه

فيفيان (بتأثر شديد)

لوسمحت يا استاذ اطلع بره الفصل بتاعى ..

قطع 66 A - نري سعيد قادم نحوهم

مصري

ماتحوليش تتهربى .. قولى فايكنج قولى فولفو ..
قولى .. قولى ولو انتى صح اتفضلى قولى

ميرفت (تكاد تبكي)
طبعاً صح .. فولفو .. فاينك

مصري (بصوت عالي)
فاينك .. انتي فاينك نص عمر ك ..

تأتي ميرفت تتوجه لتفك اشتباك مصري وفيغان ..

ميرفت (لمصري وفيغان)
فيه ايه بس؟؟

مصري
بتعلم الاولاد انجليزي غلط

ميرفت (لفيغان ثم لمصري)
معش دبستك في حصتي... هي اصلاً مدرسه موسيقي

مصري
وطب وتخلي ليه غير المتخصصين يدرسو حاجات ميعرفوهاش... انتي مش متخيله بتتلق انجليزي ازاي

تأتي عبير

عبير (بالفاء لفيغان)
ابله فيغان احنا مستنيينك في اوده الموسيقي

فيغان متأثره ولا ترد وتكاد تبكي

ميرفت (لعبير)
اسقي انتي عالبروفه والابله جايه علي طول

مصري
عال بروفه ... يانهار اسود... ده المرض منتشر في المدرسه بأه

يأتي سعيد ليري ميرفت

سعيد (لنفسه بحب)
ميرفت

ميرفت (بذوق لسعيد)
ازيك ياسعيد

مصري
يلا بينا يا سعيد

مصري يتوجه للرحيل.. سعيد يستوقف مصري يريد ان يقف فتره مع ميرفت

سعيد (مرتبكا لمصري جاذبا اياه ليستمر في وقفته)
انتو عرفتو بعض ولا لأ... دي ميرفت يا مصري... ميرفت عرفتها

مصري لا يتغير وجهه بل ينظر لها باحتقار من اعلي لاسفل

مصري
آه اتعرفنا .. مدرسة اللغه الغريبه اللي بيدروسها علي انها انجليزي

مصرى ينظر لها بقر ف ولايتذكر

سعيد (بحب)

دى ميرفت يامصرى .. ميرفت .. افتكترها

مصرى

لا .. كفايه انت فاكرها فيرى ماتش

سعيد(مخاطبا مصري وهو ينظر لميرفت بحب)

ايه ده .. دى صححتك مخارج الفاظ اهو

ميرفت تري نظرة الحب في عين سعيد

ميرفت(بحب)

تسلميلي يافيفيان متشكره اوي

مصرى(بسخرية)

...ميرفت وبروفه وفيفيان ..ايه التلوث اللي انا سامعه ده

فيفيان

مين ده يا ميرفت ؟

سعيد

ده مصري العربى .. مصرى بتاع زمان

ميرفت (بذهول وترحاب)

مصري !! اهلا

م / 67 نهار - داخلي

مدرسه - حجرة الناظر

نري الناظر الذي رأيناه في الصورة وقد تقدم به السن يدقق في مصري وبجواره ميرفت وسعيد

الناظر

والله للأسف مش هاقدر اساعدك ... من كام سنه
حصلت حريقه في الارشيف وراح فيها كل الورق

مصري

طيب والحل يا حضرة العمده .. ااا يا حضرة الناظر؟

الناظر

مممكن بكره تلحق امتحان العربى بتاع محو الاميه

مصري

وده بيبقى بالانجلش

سعيد

انجلش ايه ! بيقولك العربى .. انت اخبار العربى معاك ايه ؟

مصري

كل اللى فاكركه فيه كام حرف كده .. الـ H والـ M وجايز الـ O .. الواو يعنى

سعيد

متقلّش .. بص .. هاخليك طه حسين في العربي

مصري

اهو ده اللى ممثل بقى

شارع-باركنج

مصري وسعيد يسيران علي اقدامهم...نري صف طويل من السيارات من الخلف ونري لوحات السيارات من الخلف ... سعيد يشير للوحة سياره ليعلم مصري كيف يستهجي الحروف .. مصري يقرأ

سعيد

اقرا دى

مصري

خه.. شين .. خش

سعيد

وعكسها ايه

مصري

شخ

سعيد ومصري ينتقلون من سياره لآخرى ليقرأو من اللوح

مصري

ته .. فه .. تف

عين .. لام .. يه .. على

واو .. شين .. يه .. وشى

لام .. اوه .. واو واو .. لو

نون .. جيم .. حه .. تيه .. نجحت

يه .. الف .. يا

عين .. ريه .. عر

تأتي سياره جديده تركن بجوار آخر سيارة ذات اللوح المكتوب عليها **عر**...نري اول حرف في السياره الجديده هو سين

مصري

سيه .. العربيتين الاخرينين دول ميركنوش جنب بعض ابدا

م / 69 نهار - داخلي

فصل امتحان محو الاميه

نساء ورجال تعدو الستين يمتحنون و فيفيان تراقب عليهم .. الجميع يكتبون ومصري قلمه امامه ومربع اليدين .. سعيد واقف في الشباك قلق علي مصري .. فيفيان تنظر لمصر من بعيد بود بدون ان يراها...مصري يلتفت لفيفيان

مصري (لنفسه)

ده مافيش ولا سؤال جه من النمر ..

مصري يرفع يده لتأتي فيفيان التي تحول وجهها للجديه

مصري (لفيفيان بالفاء)

علي فكره انتي كلامك طلع صح الناس اللي بيلبسو قرون طلع اسمهم فايكنك والعربيه طلع اسمها فولفو.. ممكن تغشيني اي حاجه عشان مكتبتش حاجه

فيفيان

اتفضل حل ياطالب

فيفيان تتخطي مصري فينقلب وجهها للضحك

مصري

طب ممكن اخش الحمام مزنوق بجد

فيفيان تقلب وجهها من الضحك الي الجديه وتلتفت لمصري

فيفيان (بجديه)

بعد الامتحان

فيفيان (لجميع)

.. اكتبوا اخر جمله .. مداخلاتي في بنك الائتمان الزراعي

تأتي ميرفت لتقف بجوار سعيد لتراهم فيفيان وتسلم عليها بدون كلام...نري سعيد فرح للغاية ويبدو عليه الحب..ميرفت تلتفت لسعيد وتسلم وتومئ برأسها بالتحية

مصري (لفالاح بجواره بهمس)

الائتمان دي بتتكتب ازاي ؟

الفلاح

همزه علي ناصيه

مصري

علي ناصيه ... ايه على ناصيه دى !! همزه صايغه يعنى

مصري (للفلاح بضيق)

يعني ايه ناصيه ؟

امراه (بهمس)

اسمها همزة علي نبره

مصري (للفلاح)

وانا اقول برضه ناصيه ايه شفت!! اسمها همزه علي نبره

مصري يبدو انه ادرك ما يعنيه همزه علي نبره ويهم بالكتابه ولا يعرف

مصرى

يعني ايه نبره ؟؟

ميرفت

الوقت خلص كله يسيب القلم

مصري يترك القلم ويخرج من الحمام جريا

م / 70 نهار - خارجى

حوش المدرسه

يجرى مصرى على الحمام الخاص بالطلبة ولا يعرفه ويقابل حماسه يلعب

مصرى

حماسه ..

حماسه

ايه ده ؟ هو انت معانا فى المدرسه

مصرى

لسه بقدم .. الحمام فين ؟ قول فين متبقاش عيل .. كمان هاتبقى ورزل

حماسه

عايز تعمل وساخه ؟

مصرى

اعمل ايه ؟ وساخه .. اه .. انطق فين بقى قبل ما اوسخ معاك ؟

حماسه

اخر الطرقة

م / 71 نهار - داخلي

حمام المدرسه

مكتوب بقلم فلوماستر علي الباب (حمام ولاد و مزز وسجاير) مصرى یرى الحمام مقفول بالقفل ومكتوب عليه يافطه
" الحمام مغلق حتى لايساء استخدامه " فيجرى وقد اصبع مزنوق زياده

م / 72 نهار - خارجى

امام الكانتين

فيفيان تقف مع سعيد

فيفيان

سعيد علي فكره ميرفت متقدم لها عريس.. انا عارفه ان انت في حاجه من ناحيتها

سعيد يمتنع وجهه في لحظة

سعيد (منكرا ومخفيا مشاعره)

حاجه زي ايه ... مفيش حاجه

... ياتي مصرى لا يستطيع المشي ويحك قدميه في بعضهم ويسير ببطئ متألما ..

سعيد

مالك يامصري ؟

مصري (صوته لا يطلع)

عطشان .. عطشان .. هاموت .. ممكن مفتاح الفزبه اروح اشتري ميه

مصري يأخذ منه المفتاح .. مصري يمشي بخطوات ضيقه اقل من سنتيمتر واحد في الخطوه... ففيفيان تبتسم لفعل مصري.. سعيد متضايق

م / 73 نهار - خارجى

شارع المدرسه

مصري يدير الموتسيكل فلا يدور فينزل ويضع السلك في مكانه كما فعل اول مره .. فلا يدور فياخذ طوبه ويضرب بها الموتور
و يجرب المفتاح ... فيدور الموتسيكل ... سعيد يجرى بالموتوسيكل

مصري (لشخص بالانجليزى)
الحمامات العامه اللى هنا فين لوسمحت ؟
طب الكنيفات العامه اللى هنا فين ؟ عايز بيبي

الشخص
يعنى ايه ؟

مصري
عايز اعمل وساخه .. محصور عايز اتصير .. اتصير

الشخص
طب ماتتصير فى اى حته

مصري
يعنى مافيش حمامات عامه

الرجل
حمامات عامه .. ها

الرجل يضحك ويتركه ويمشى

مصري
لايمكن .. هامسك نفسى مهما حصل

قطع 73 A - الكاميرا على خط مياه على الارض ونسمع صوت مصرى ونرى مصرى وجهه للحائط وجواره الفيزبا

مصري
ازاى اعمل كده ازاى .. انا منخط .. انا منخط منخط .. اه اه

يأتى سعيد ويقف بجوار مصرى ... سعيد يبدو عليه الضيق

سعيد (متفاجاء)
مصري !!

مصري يتوتر فيكمل الترتره على سعيد

سعيد (بضيق)
ايه ده حاسب حاسب ..

مصري (يلف)
او عى تصدق عنيك ..

سعيد
طب ركز فى اللى انت فيه .. قولى .. دورت الفيزبا ازاى ؟؟

مصري

عدلت ريلاي الكتاوت دارت علي طول

مصري يقول كئاوت كما قالها سعيد من قبل ويأتى حماسه ليقف بجوارهم فى وضع التبول

حماسه

انا داخل محدش يطرطش

مصري

طب اللى يخلص اخر واحد يبقى هو اللى كسبان

سعيد

بلاش اللعبة دى

قطع B 73 - نرى مصرى وسعيد(الحزين) جالسين على الفيزبا من فتره وحماسه مازال يتبول

مصري (بز هق)

الله يلعن ابوه دى لعبه .. خلصنا بقى يا حماسه ..

انت خدت الموضوع على كرمك ليه كده ..

صوت الماء يتوقف

مصري

يااااااه اخيرا

صوت الميه يعود

مصري

امال الصمت اللى حصل ده كان ايه .. فترة اعلانات !

سعيد (بحزن لمصري)

ميرفت متقدملها عريس

مصري

الحمد لله في ستين داهيه

سعيد (بتأثر)

بس انا بحبها ومش عايزها تروح مني

مصري

يا راجل مع السلامه... انت مش شايف لبسهاهي وصاحبتها عامل ازاى.. بصراحه هما الاتنين بيئه

.... ماتيلا يا حماسه

سعيد

بيئه ؟؟

سعيد يهز رأسه مدركا ان مصري لا يشعر به

م / 82 نهار - داخلي

الجميع

مصري اول واحد في الزحام امام موظف ويناوله الورق ونرى الكتاب فى يده وسعيد بجواره

مصري

آدي شهادة محو الاميه ومعاهها كل الورق المطلوب .. اتفضل

م 83 نهار - داخلي

مكتب التصوير

غرفة بها كاميرا علي حامل ويوجد عسكري جالس علي كومبيوتر يكاد لايري منه من يتصور

العسكري
اقف هنا

مصري
حالا .. ثانيه واحده بس

مصري ينظر للكاميرا ويقف في المكان الذي اشار له العسكري ويعدل من نفسه ويشكل مربع في الهواء (كما المخرجين)
العسكري يضغط علي زر التصوير .. فريز فريم علي وجه مصري وفمه مفتوح

مصري
انا جاهز حضرتك

العسكري
انا صورت من زمان

م / 84 نهار - داخلي

شباك استلام البطايق

سعيد يبدو عليه الضيق يقف بجوار مصري

موظف (ينادي)
مصري سيد عربي

الموظف يتفحص وجه مصري ثم يمد يده بالبطاقة لمصري ومصري ينظر فيها

مصري (للموظف)
ايه ده انا اسمي مصري السيد .. مش مصري سيد .. ممكن نغيرها

سعيد (بتحذير)
هانعمل الاجراءات من الاول

مصري
من الاول .. ان شا الله يكون مكتوب سيده

مصري ينظر في صورة البطاقة ثم يضعها في جيبه بدون تعليق

سعيد
البطاقة لحظه كده

مصري يشير لسعيد بطريقة ليه .. سعيد يومئ برأسه كأنما يقول هاتها بس .. مصري مرغما يخرج بطاقته .. سعيد يتحول من حزنه الي الابتسامه .. سعيد يطيل النظر للصورة فيضحك .. سعيد ينفجر ضاحكا

مصري (بغضب)
ماسمعتش كلمة ياسعيد ..

م / 85 نهار - داخلي

الجوازات

مصري يقف امام موظف كبير في السن ينادي علي الاسامي

الموظف
نعيم يوليوس قيصر

نري شخص يري الموظف بطاقته ويمضي ثم يأخذ الباسبور .. الموظف يغارد كأنما انتهى من تسليم الباسبورات

مصري (للموظف)
أومال انا باسبوري فين

الموظف
مين حضرتك ؟؟

مصري يفكر لا يريد ان ينطق اسمه

مصري

انا اسم بابايا السيد العربي عشان اسمي بيعمل مشاكل بس

الموظف ينظر امامه لنري باسبور به صورة مصري

الموظف

مصري سيد العربي... بطاقتك ...متقول مصري ..ايه مستعر

مصري يخرج بطاقته ويناولها للموظف

مصري

ابقي جرب وقول انت حضرتك

قطع 85 A - الضابط يناول مصري الباسبور .. مصري ياخذ الباسبور

الضابط

اتفضل البازبور

مصري

ايدك ابوزها .. بزبورى المزري...انا آسف والله...حقك عليه

مصري يقبل الباسبور المصري

مصري(للباسبور)

سفرني بأه ابوس ايدك

م / 86 نهار - خارجي

امام منزل مصري

مصري ينزل من علي الموتسيكل ومعه ظرف الاوراق وزجاجة الماء .. سعيد حزين.. مصري يحاول ان يواسيه

مصري(محاولا اخراج سعيد من حزنه)

خلاص بأه ياعم متزعش... عمال تقول انا ملك الموتسيكلات ماتورينا الحركات

سعيد يبتسم لمصري ثم يرفع حصان بالموتسيكل

سعيد(مبتسما)

تجرب ؟

حماسه

مش هايعرف ده فرفور

مصري

سكت اخوك يا سعيد انا مش عايز احتك بيه .. انا بس عايز اروح السفاره سليم

مصري يركب ويدوس بنزين ويسيطر علي الموتوسيكل ويدوس اكثر ويختفى ... ثم نراه أت بسرعه من بعيد وهو متمكن من الموتوسيكل وابتسامه عريضه علي وجهه...مصري يعبر بجوار سعيد وحموسه .. ويشجعونه مصري في غاية السعادة يرفع حصان في مواجهة سيارة راكنه ... تنزل العجلة الامامية علي بربريز السيارة... نري زجاج السيارة تسببت في سرطان للبربريز لكنه مازال واقفا والعجلة الخلفيه علي الكابوت سعيد وحموسه ينظران يمينا ويسارا...ليري اذا كان صاحب السيارة رآهم

مصري

مش انت عامل انشورنس قصدي تأمين .. عشان نصلح للراجل

سعيد

تأمين ايه .. هو انت معاك فلوس

مصري ينزل بالفيزبا من على العربيه ويجرى عليها سعيد ووراءه حموسه كالقروء

حماسه (المصري)

ياللا .. اركب اركب ..

مصري يعود للعربيه ويخرج كارت ويرفع المسحات ليضعه

مصري

ممكن لما يكلمني يبقي معايا فلوس غير فلوس الفيزا

مصري يترك المساحه وبمجرد ان تلمس الزجاج تحطم نصفه تماما فيأخذ الكارت

مصري

كده هايكلمني بطريقة مش كويسه .. مش مهم

مصري يجرى ويقفز خلف حماسه وينطلقون بالموتوسيكل ولكن الموتوسيكل لايعمل فيسحبونه ويجرونه

م / 88 ليل - داخلي

منزل مصري - السفرة

سعيد يعد العشاء حزينا(سرحان) ومعه حماسه يساعده ومصرى جالس على الكنبه بالجلابيه ويمشى ثم يُدرك انه لم يتكعبل فيفرح

مصري

متكعبلنش !! الجلبيه اتحسدت

مصري يمشى بثقه فيقع وحماسه يضحك

مصري

اسمع كلامي وواجه ميرفت راجل لراجل وقولها علي اللي جواك..انا عايز اساعدك

سعيد

اخاف ترفضني ساعتها ممكن اموت نفسي

مصري يبدو انه يستوعب الموضوع ويفكر...ثم يبدو انه فكره جاءته

مصري

طب يا سعيد ساعدني انت .. انا بحب واحده

سعيد

بتحب بنت .. مين دى ؟؟

مصري(يختار اي اسم)

اه .. فيفيان

سعيد

فيفيان !

مصري

ليه بتعد تكرر الكلام اللي انا بقوله ..ايوه بحب فيفيان

سعيد

امتى .. حبتها امتى ؟

مصري

يوم الفيهات الكثير...عجبتني أوي الاكسنت بتاعتها...بروفه وفايكنج وحييتها فعلا يوم الامتحان

سعيد

انت بتتكلم جد ؟

مصري

ايوه سعيد .. انا انسان برضه .. بس انا عندي نفس مشكلتك
مع ميرفت .. انا ابن ناس وفيفيان بيئه .. وممكن مترضاش تحبني

سعيد

لا لا .. انت فاهم غلط .. هنا البت البيئه تتمنى تتجوز

واحد ابن ناس .. بس بنت الناس لا يمكن تتجوز واحد بيئه

مصرى

طب اشمعنى يعنى .. طب ممكن تساعدنى وخلص

سعيد

ازاى !!

مصرى

اكتبلى جواب بطريقة البيئه وانا هادو هلهيا ويارب توافق ..

سعيد

مش قديمه شويه طريقة الجوابات دى

مصرى

يا عم ماقديم الا الشيطان

قطع 88 A - سعيد قد انتهى من كتابة الجواب ويهم بكتابة اسم مصرى ولكن مصرى يمنعه

سعيد

والسلام ختام ..

مصرى

خليها والسلام ختام ياوطيه

سعيد

واطيه ايه ؟

مصرى

كلام بيئه كلام بيئه .. اكتب

سعيد

اكتب ايه .. لأ .. كده خلاص هاكتب اسمك وخلص

مصرى

لأ متكتبش اسمى علشان لو رفضت .. يبقى معرفتش

مين اللى بعث الجواب ومتجرخش احساسى

ام سعيد تدخل عليهم

ام سعيد

ياسعيد .. ياسعيد .. عمك هلال تعب فى الشغل ووده المستشفى

غرفة بمستشفى حكومي

غرفة كبيره بها العديدي من السراير المعدنيه الرديئة المتجاوره بدون اي خصوصية.. هلال راقد تعبانا وبجواره دكتور متواضع الهيئه .. وسعيد ومصرى وام سعيد والبنات واقفون حوله... نري نائمة تحت سرير عم هلال...مصري عينه علي القطه لاينزلها

الدكتور

ياجماعه انا قولتله ميت مره بس هو مببسمعش الكلام لازم يبطل تدخين ويعمل توسيع شريان

هلال

ما انا رحت وقالولى لازم تدفع مش عارف ادايه علشان تدخل فى الدور

مصري تركيزه مع القطه

مصري (مشيرا للقطه)
هي دي ايه يا دكتور

الدكتور يلتفت لما يشير له مصري

الدكتور (بلامبالاه)
قطه

مصري (بسخرية)
طب الحمد لله كنت بحسبها زرافه

سعيد

لازم رشوه يعنى يا دكتور علشان يدخلوه من ضمن اللسته .. ويعمل العمليه .. يحينا ويحيك ربنا

الدكتور

عموما خد بالك من نفسك وبطل سجائر .. انا بقولك اهو .. سلاموا عليكموا يا عم هلال زخلوه ياخذ الحقنه علشان مش عايز

مصرى

ليه ياعم هلال .. مش عايز تاخذ الحقنه.

هلال

ماحبش الحقن

مصرى

.. طب خت شربه

مصرى مع عم هلال مكثف يديه واخت سعيد تعطيه حقنه ومصرى فرحان فيه

م / 90 ليل - داخلي

منزل مصري

مصري وسعيد يجلسان

سعيد

مصري ممكن تديني فلوس من معاك بس
علشان نعرف نحجز دور لعم هلال

مصري

عايزني ادفع رشوه ياسعيد !! ما انت عارف انا مبدف عش رشوه

سعيد ينظر لمصري بمعنى انت هاتستهبل

مصري

غير في المجمع بس .. سعيد .. انت عارف ان الفلوس اللي معايا فلوس الفيزا ..

سعيد

هابقي ادفع معاش ابويا وربنا يفرجها في الباقي

مصري

عين العقل .. اصيل ياسعيد .. انا لازم انام علشان
عندي ميعاد في السفاره بدرى .. ادعيلي اخذ الفيزا

سعيد

اوصلك

مصري

بس لو اتأخرت هاتصرف

م / 91 نهار - خارجى

شارع

اتوبيس مزدحم قادم نحو مصرى ويقفز فيه

الكومسري
فاضي جوه يابهوات

مصرى
متقلش هايفضى عليا و عليك دلوقتى .. بس دقيقه بس الواحد يركز

مصري يحشر نفسه بين لحم الناس ليمر الي الخلف ويركز بوجهه لاطلاق ريح .. شخص يلتصق بمصري من الخلف يرتدي جلابيه وجاهم الوجه وشعره منكوش...اللاتوبيس يفرمل...الرجل يندفع في اتجاه مصري

مصري (يتوجع)
آه .. ايه ده ؟

مصري ظهره للمتحرش ويحاول لف وجهه ليكلمه لكنه لا يستطيع من الزحام .. امرأه عن يمين مصري تنظر للمتحرش بكره .. رجل امام مصري طويل وعريض وشكله بلطجي و يظن ان مصري يكلمه

الرجل امام مصري (بيلطجه)
في ايه مالك ؟

مصري (بذوق)
لا حضرتك ان بكلم اللي ورايا

مصرى يحاول اخراج ريح ولايستطيع .. فرمله أخري الرجل خلف يلتصق بمصري مجددا..

مصري(بغضب هذه المره)
عيب كده يا استاذ انت

الرجل امام مصري (بيلطجه)
عيب ايه هي تلاقيح جئت

مصري
مش انت والله بكلم اللي ورايا .. سيبني اركز بقى .. ياريتنى كنت فول ماكان قدامى يعنى الواحد لما يعوزيك ميلقكيش .. اى .. انا لواعرف الفك بس

راكب اخر
اوعى .. ده لولفلته ممكن ييوسك .. انا عارفه ده المتحرش الرسمي بتاع الخط

مصري (للجميع)
المتحرش الرسمي !!..ياجماعه مفروض مانسكتش علي اللي بيحصل ده .. لو اي حد اللي وراه اتحرش بيه زى كده .. المفروض يبلغ البوليس

نري الاتوبيس كله يضع وجهه في الارض .. الاتوبيس يفرمل .. والمتحرش يلتصق به مجددا بطريقة اقوي

مصري (للاجل خلفه)
انت ايه .. مش كده بقى

الرجل امام مصري فقد اعصابه ويمسك بمصري من تلايبه

الرجل امام مصري
ماتحترم نفسك بقه .. ساكتلك من الصبح

مصري
اوكى تعالى اقف مكانى

الرجل
ياريت .. تعالى

مصري
هو ده اللي كان مضايكك .. طب ماتقول

الرجل يبذل مع مصرى ويفرمل الاتوبيس فرمله قويه فيقع مصري بظهره علي حجر الرجل المتحرش فيخرج اخيرا صوت ربح اخيرا

مصري (المتحرش)
جت علي مزاجك الوقعه ..

المتحرش
قوم الله يقرفك

قطع 91 A - مصري يقفز من الاتوبيس وهو ماشى امام السفاره

مصري (لنفسه)
بقيت محترف اتوبيسات

طابور السفارة

مصري معه زجاجة المياه المعدنية واقف في الصف الذي به رجال ونساء وشباب والجميع يحمل دوسيهات واوراق يطالعها... البعض يسمع لنفسه كأنه داخل علي امتحان ..خلف مصري نري شاب بيئه قصير يسمع لنفسه ومندمج في ترتيب اوراقه

مصري

هو ايه الاوراق دي كلها

القصير

اسئلة السفاره معروفه وكله بيأمن نفسه

مصري

بيسألو في الفيزيا جوا

القصير

لا هابيسالك تشتغل ايه وبتقبض كام

القصير يخرج لمصري الدوسيه الذي يحمله

القصير

اقوله شغال ميرمج كومبيوتر واوريله المهنة في الباسبور..طلع عيني والله عشان اغيرها من فني كومبيوتر لميرمج جي و واقوم مديله الاتش آر..خمستلاق ستميه وخمسين جنيه ..رقم وكسور عشان الحكبة

الولد يفتح باسبوره ليري مصري مهنته

القصير

الا حضرتك مكتوب في باسبورك شغال ايه

مصري يفتح باسبوره

مصري

حاصل علي شهادة محو الاميه..بس انا وضعي مختلف..والورق ده كله عشان الشغل والمرتب بس القصير يخرج لمصري الدوسيه الذي يحمله

القصير

لا لا...دول عشان لما يسألوني معاك فلوس في البنك باسمك..اقوم مديهم دي..كشف حساب بتمانين الف جنيه...خالي حطهملي وسحبهم في نفس اليوم...كشف حساب حضرتك بكام

مصري

انا معيش كشف حساب مصري ..بس انا مش هابسنلوني الاسئلة دي انا وضعي مختلف...وباقى الورق ده

القصير

لا دي شوية املاك علي اسهم بعثها من زمان اي كلتش افهمهم اني ابن ناس

مصري

هو ده بس اللي ببسألو عليه

القصير

لا ناقص اهم سؤال ...ايه اللي هاخليك ترجع مصروماتكوتش

مصري
ودي ليها ورقة برضه

القصير(متذكرا)
لأ دي ليها اجابه نموذجيه..آه

القصير يبدأ في التمثيل المؤثر

القصير
انا بحب مصر جدا.. ليه معرفش...يمكن عشان ذكرياتي الحلوه فيها... يمكن عشان اهلها الطيبين ..هي عشوائيه آه..انما العشوائيه دي مديه روح كده..دفي..انما امريكا بتخلي الواحد زي المكنه..انت مش محضر حاجه تقولها

مصري
انا وضعي مختلف مش هاپسئلوني كل الاسئله دي

91 - Cنهارداخلي

السفارة

نسمع اسم مصري عربي السيد بالكامل يقال بلهجه امريكيه مصري يقوم ليتوجه للشباك...نري الشاب القصير علي شباك
آخر يمثل...مصري امام القنصله التي يبدو عليها البرود وتتفحص باسبور مصري

القنصله
You have a bank statment
مصري
nop

القنصله تكتب في ورقه بجانبها علامه

القنصله
?You have hr letter

مصري
Nop cus I work in the states

القنصله(مقاطعة)
?What s your profession

مصري
I am a professional photographer.i have a master degree

القنصله تتفحص باسبور مصري

القنصله
Your passport tells that you have only
محو الامية

مصري ينظر للولد البينه القصير يناول بعض الاوراق للقنصل امامه وهو متأثر...

مصري(للقنصله)
I am an American citizen but I lost my passport you can check that on the computer.masry
elsayed elarabi

القنصله تتفحص وجه مصري بشك ثم تضرب بعض الازار ثم تفتح آخر صفحه في الباسبور ونري ختم Rejected
القنصله تعيد الباسبور الي مصري

القنصله
We do have masry elsayed but your passport tells that you are masry said

مصري (فاقد اصابه)

What the hell how can you reject me

مصري يثور يخطب علي الزجاج

مصري

I am American like you,

يأتي رجال الامن ويمسكون مصري...مصري ثائر بشده...ويحاول المقاومة بقدميه التي تدفع الهواء

91- D-نهار داخلي

خارج السفارة

رجال الامن يرمون مصري كما رماه رجال الفندق من قبل...مصري يعدل من هندامه..مصري ينتبه لزجاجة المياه المعدنية
الفارغة في يده...مصري يرمي الزجاجه في الارض معبرا علي غضبه ... نري الولد البينة يشير بيده كمن احرز هدفا فرحا
يبدو انه اخذ الفيزا

91- E-ليل-خارجي

كورنيش النيل

مصري يسير حزينا لا يري امامه...يمر بجوار شخص مصري لايفاديه...يصطدمان كتف بكتف

الشخص

ما تفتح

مصري يكمل طريقه ولا يأبه

91- F-ليل-خارجي

منزل مصري

سعيد وامه وهبه اخته وسمعه ونيفين جالسين...مصري يدخل راسه في الارض

ام سعيد

مبتدش ليه يابني علي التلفون

سعيد

ها عملت ايه؟؟

مصري

اترفضت

سعيد(بهزار)

فعلا الامريكان مبيغلطوش..مبيرفضوش الا الزبالة

مصري ينظر لسعيد بعتاب وحزن

سعيد

بهزر ياعم متزعلش

مصري(بتأثر)

اعمل ايه انا دلوقتي..انا مسجون في البلد دي

ام سعيد

احنا مقصرين معاك في حاجه يابني

مصري بيتسم لها كمن لاتفهم مراده...الجميع ينتظرون رد مصري

مصري (بتأثر)

انتو مش فاهمني... انا مش من هنا.. لا ده لبسي ولا ده شكلي لاده انا... انا لافاهم الناس ولا الناس فاهماني.. الناس هنا ليهم اسلوب وانا ليه اسلوب ثاني.. مش قادر اعيش هنا عايز امشي بأه

مصري يتركهم ويدخل غرفته

90 -G ليل خارجي

غرفة مصري

مصري جالس علي السرير.. يدخل عليه سعيد ويجلس بجواره

سعيد

خلاص مش قادر تصبر

مصري

تعبت.. تعبت ياسعيد

سعيد

هاتفرج... بكره هاتفرج ان شاء الله... عارف وانت بتقول لا ده لبسي ولاده شكلي ولاده انا فكرتني بأغنية

سعيد يدندن بهزرا بأغنية لادي ملامحي ولا شكلي شكلي ولاده انا... سعيد يربت علي كتف مصري بحب

م / 92 صباح - خارجي

بائع فول

عبير واقفه امام عربة الفول ومعها مصري...مصري الان غير ملابسه الامر يكية بملايس مصريه كأنما استسلم للامر الواقع

عبير

جانتجيب فول (بالـ v)

كلمة عم تؤثر في مصرى

مصرى (يضحك)

فول ايه يا عبير .. اسمه فوول .. بالفه

عبير

والله انت حيرتنا معاك يا عم مصرى

مصرى يُخرج من جيبه الجواب ويكتب بالقلم اسم ميرفت ويوقع بأسم سعيد

مصرى

بقولك ايه يا عبير .. عمك سعيد كان دينى الجواب ده اديه لميرفت بس انا متأخر ..
ادهولها انتى وقوليلها عم سعيد بعثلك الجواب ده .. واديه شقتين الفول دول .. قصدى الفول

عبير تضحك وتأخذ الجواب .. مصرى يرى لقمة عيش تقع فى الارض من بقايا احد الواقفين .. فيلتقطها ويقبلها ثم يهم بأكلها
ولكنه يتراجع ويضعها فى جيبه والذى بجواره ينظر لما فعله مصرى

مصرى

اصلى مش جعان دلوقتى .. لما اجوع هاكلها

مصري (للبنائ)

الا صحيح ياعم ربيع .. انت بتعدي كل يوم .. ولا يوم ويوم

عم ربيع

من قبل ماتتولد انت و عمري مافوت يوم

مصري بيتسم لعم ربيع.... تقف سيارة كالتى كان يقودها مصري وبها اسره

السانق

اروح الهرم ازاي ؟

مصري

العربيه دي فيها جي بي اس ؟

الرجل

لا ..

مصري

ولا نافيجاتور ؟

الرجل

لأ فيها نافيجاتور

مصرى

اطفيه ابوه .. قولى زورتوا القلعه ؟

الرجل

لأ هانزوحها بكره

مصرى

اكتب فى النافيجاتور علوان البرج .. هايوديك القلعه علطول

الرجل

بس انا عايز اروح الهرم

مصرى

خلى الهرم فى يوم تانى .. روحوا القلعه الاول ..
واسأل على عم منصور هايوديك الهرم ..

الرجل

بس انا عايز اروح الهرم

مصرى

يبقى اطلع علي طول straight

الرجل

قصدك ستريت !!

مصري

آه سوري نسيت .. ستريت .. في تاني لوتيرن

الرجل يحرك السيارة شروعا في المغادرة

مصري(للرجل بعد ان غادر)

طب ماتتفضل

يمر بعض الاشخاص الحرفيين(الذي رأيناهم من قبل) ...عنبه وبيسو

مصري

عنبه اتفضل

عنبه

مساءك فل يا مصرى

بيسو

قشطه يا مصرى

مصرى

حبيبى يابيسو .. اتفضل

شخص

سلاموا عليكو

مصرى

عيكوا اسلام وسحة الله وبركاته .. اتفضل

م / 87 نهار / ليل - داخلي / خارجي

فوتومونتاج

A - وسعيد وميرفت وام سعيد وحماسه والبنات يلعبون كوتشينه...مصري حزيننا يرفض اللعب في بادئ الامر ثم يلعب
B - مصرى يقوم بتصوير اخوات سعيد البنات مع امهم وهم جالسون على الكنبه
B-1 مصري في السفاره مع السفير الذي قابله من قبل

السفير

لسه مفيش اخبار...سيبلنا عنواتك

C - ابتسام بتتخافق مع عبد المنصف .. ومصرى يقف مع عبد المنصف فى البلكونه ويتحدث معه..
D - مصرى واقف مع ابتسام وهى تشرح بيدها الموقف وتبكي..
E - عبد المنصف يدخل على ابتسام البلكونه ويقبل رأسها ويشكر مصرى

F - مصرى يرى ام سعيد تقف فى طابور العيش فيقف بدلا منها وتعطيه القفص وتتجه للبيت
G - مصرى فى جامع مع سعيد..مصري رجله متسخه و يقرب قدمه من رجل بجواره والرجل يبعد قدمه ...مصري يصمم ويقرب رجله اكثر للرجل

م 93- A ليل-خارجي

كورنيش النيل

مصري جالس و معه كاميرته وسعيد هو الذي يقوم بتصوير بكاميرا من كاميرات المصورين السريحه عريس وعروسه
علي الكورنيش.....يبدو ان سعيد اتقن التصوير...مصري يقوم ليصور صورته بنفس كاميرة سعيد

سعيد يبدو انه يعرف العريس والعروسه

سعيد

اضحك يامنص .. اضحكى يامديحه

العريس

نيجي امتي ؟

مصري

ربع كده والصور تبقي جاهزه

مصري اصبح يتحدث العربيه بطلاقه...مصري يتوجه لسور الكورنيش ليجلس عليه وليجلس عليه راضي

سعيد

هي امريكا حلوه اوي زي مابيقولو كده ؟

مصري (بتأثر)

والله مانا عارف يا سعيد

نزي الكناس الذي رأيناه سابقا يتجه ناحية مصري وسعيد

الكناس

يا عم دوختني عليك... سايب عنوانك في السفاره كورنيش النيل... وادوخ انا الكورنيش عليك كله مشي

مصري

ده عنوان العمل.. وبعدين بتسأل عليه في السفاره ليه

الكناس

لأ عشان كنت عايز اديلك ده.. مش دهي حاجتك برده.. كان فاضلها يومين وتبقي حلالي

الكناس يخرج من شنطة فلوس مصري

سعيد

ايه ده ... كنت بتاكل عليه ولا ايه؟

مصري يفتح الشنطه ليري الفلوس ثم يخرج الباسبور لايصدق نفسه...يمسك الباسبور يفتحه...مصري تنتابه مشاعر متناقضه.. يبدو عليه الفرحة الشديده ثم ترتعش شفتاه كمن لا يصدق و تدمع عيناه...مصري يقلب في الباسبور...

سعيد يبدو عليه الفرحة لفرحة مصري

مصري (فرحا)

باسبوري رجعلي ياسعيد

مصري (دامعا)

باسبوري رجعلي ياسعيد.. فلوسي هاسافر يا سعيد

سعيد مابين الحزن والفرح

مصري

اعملك ايه .. عايز كام

السايس

مش عايز حاجه ياسيدي... اللي تجيبه

مصري يقبل السايس

الكناس

ولا اقولك ايدك علي الحساب القديم لما سلكتك من الميدان وخلعت .. فلكر

مصري بسعاده يخرج ورقه يعطيها للسايس الذي ياخذها بسعاده

مصري

خد... تاني؟؟ انا معايه كريدت كاردس

الكناس

لو مضايقينك هاتهم

مصري يعطيه كل الفلوس... ياتي العريس والعروسه

العريس

الصور جاهزه

مصري يخلع الكاميرا من علي رأسه ويلقيها في النيل

مصري (العريس)
الصور في النيل بأه يا حبيبي
سعيد ينظر لمصري بضيق.. العريس ينظر لمصري باستغراب

م 93 - Bنهار-داخلي

غرفة مصري

مصري يرتدي بدله شيك وتسريحة شعره كما رأيناه اول الفيلم...نري حقائبه جاهزه...يدخل عليه سعيد متضايق...مصري سعيد للغاية ولايشعر بحزن سعيد

سعيد(بضيق)

خلاص مش قادر تعد معانا كمان في مصر

مصري(سعيد)

الصراحه امريكا وحشتني اوي..النظام ..الهدوء..النضافه

سعيد(باستنكار)

طب ماتأجل سفرك يوم كمان وتصور حفلة المدرسه

مصرى

صورها انت بقى يا سعيد انت بقيت محترف.. انا لازم اكون في الشارع كما ن عشر دقائق

سعيد

عشر دقائق

سعيد يغادر الغرفة بضيق..مصري لايشعر بضيقه

م / 97 نهار - داخلي

منزل سعيد

ام سعيد تفتح الباب لمصري...لنري كل عائلة سعيد عدا سعيد...هبه وابتسام وعبد المنصف وام سعيد وحماسه...الجميع جاهمين لا احد يتحدث..مصري يدرك حزنهم عليه...

مصري (بهدوء)

اومال فين سعيد ؟؟

حماسه يشير لمصري علي غرفة سعيد...نعود الي الصمت

مصري
انا حبيتكو كلكو والله

ام سعيد
لو كنت حبيتنا مكونتش جريت اول ماجالك الباسبور

سعيد يدخل

مصري (بهذوء مبررا)
معلش يا ام سعيد يادوبك ارجع الحق المعرض .. واخذ كورس
انجليزى علشان نسيته ..

مصري (محاو لا كسر الحزن)
الا انت انتى اسمك ايه يا ام سعيد

ام سعيد لا ترد

حماسه (برخامه)
اسمها ام سعيد

مصري
.. ام سعيد .. طب سعيد يبقى اسمه ايه ؟

حماسه (برخامه)
ماجده

مصري يشعر ان الكل متضايق منه...مصري يمد يده ليسلم علي حماسه...حماسه لا يمد يده ويهز رأسه رافضا السلام علي
مصري...مصري يلم يده

مصري (بتأثر)
سلامو عليكو

مصري يغادر وهو متأثر للغاية...نري سعيد خرج من غرفته اكثرهم حزناو كأنما كان يستمع للحوار

م / 98 نهار - خارجى

امام المنزل

سعيد صامت بجوار الموتسيكل مع مصري ..راضي في الميكروباص .. شنط مصري علي الميكروباص

راضي (لمصري بهذوء)
يلا يااستاذ مصري

مصري (لسعيد)
اول مره تضبط معادك يعني

سعيد لايرد ويكتم الدموع بصعوبه

سعيد
هاتو حشني اوي يامصري

سعيد يحتضن مصري بحراره ومصري يحتضنه هو وحماسه ويضع يده في جيبه ويضع لسعيد فلوس في جيبه

مصري

خد دوول انت مسيبتنيش لحظه

سعيد يتحول وجهه في لحظه الي قمة الضيق غير مصدق .. الكلمات تتحشر في فم سعيد

سعيد (بتأثر)

بتكرمشلي فلوس وتحطهالي في جيبي
أه فهمت .. ميرفت بيئه .. وانا مشواريجي

سعيد يخرج الفلوس من جيبه بدون ان ينظر فيهم ويفتح يد مصري بعنف ويضع فيهم الفلوس ويغلقها عليهم

سعيد

انا كده فهمت

سعيد يشاور لحماسه ليركب علي الموتسيكل

سعيد

هي مصلحه انت قضيتها وسلام سلام

سعيد يغادر بالموتوسيكل ...مصري يحس انه اخطأ

م / 99 نهار - خارجى

ميكروباص راضى

مصري يركب بجوار راضى الذي لم ينطلق بعد بالميكروباص ... مصري يخرج شيئا ملفوفا في ورقه

مصرى

خد دول سندوتشين فول من عند عم ربيع ..
بس مش بتسعه وخمسين جنيه .. بجنيه

راضى ينظر لمصري وهو صامت

مصرى

مش هاتضرب فول معايا .. انا عامل حسابك .. نضرب الساندوتشات
ونقل القزاز علينا ونديها وننعمى انا وانت لحد ما واحد فينا يموت

راضى (بهذوء)

اتودكت اوي وبقيت مصرى يا استاذ مصري

راضى يقود ... مصري يرتكز برأسه على زجاج الميكروباص حزينا .. راضى ينتهي من شرب علبة عصير لنراه يرميها في
باسكت صغير بجواره .. مصري يلمح الباسكت ويبتسم .. راضى يغمز لمصري كأنما تعلم الدرس .. مصري يعود لحزنه .. نري
من وجهة نظر مصري الفتاه الشحاته تسمك بجردل وتمسح العريبات نري الشيخ يخرج من الجامع يبحث عن حذائه يبدو
انه سرق .. الشيخ ببتسم ويلبس قيقاب .. نري المتحرش في محطة الاوتوبيس وحوله نساء بضربونه بالشباشب .. ونسمع
صوت كلاكسات متكرره .. مصري ينظر من الشباك لنري سعيد علي موتوسيكله والدموع في عينيه .. مصري يبتسم

سعيد (بتأثر من علي الموتوسيكل)

مهانش عليه تسافر وانت زعلان زي المره اللي فاتت

مصري (بتأثر من الشباك بصياح حتي يسمعه سعيد)

انا مش زعلان .. اوعي انت اللي تكون زعلان

سعيد (بكاء)

سلام يامصري .. سلام

مصرى

سلام ياسعده

سعيد مازال رافعا يده لمصري بالسلام بتأثر .. الميكروباص يبتعد .. مصري مازال ينظر من الشباك علي سعيد بتأثر شديد ..
مصري يخرج يده ليشاور لسعيد .. مصري يدخل رأسه من الشباك لنري ابتسامه علي وجهه

نسمع كوابليه من اغنيه عبد الحليم (فاتت جنبنا)

م / 99 نهار - خارجى

راضى ينزل شنطة مصري ويضعها علي عربة المطار .. راضى يأخذ الباسكت من ميكروباصه بتلقائية ويرمي ما في
الشارع .. مصري يضع يده علي وجهه تعجبا من فعل راضى

راضى

برضه غلط !! مره في مره هاتضبط معايه

م / 99 A ليل - داخلي

غرفة عم هلال بالمستشفى

تأتي الممرضة ببوكيه ورد و عليه كارت... عم هلال يستغرب

الممرضة (لعم هلال)
البوكية ده جالك

عم هلال
بوكيه!!

عم هلال يأخذ الكارت ويقرأ...

صوت مصري

مشكلة العملية اتحلّت خلاص ياعم هلال... بس اتضطريت اكذب كذبه صغيره كده

نري مايراه عم هلال

م / 99 B ليل - داخلي

غرفة المدير بالمستشفى

مصرى يجلس امام مدير المستشفى الذى يتصفح باسبور مصرى الامريكى ثم يناوله له

مدير المستشفى
أأمر مستر مصرى

مصرى

انا بشتغل صحفى فى النيوزويك وكنت جاي اعمل موضوع عن الصحة فى دول الشرق الاوسط ..
وبالصدفه فى واحد قريبي على قد حاله عندكوا هنا ومحتاج يعمل عملية توسيع فى الشريان .. بس
المشكلة قالولى انه لازم يدفع من تحت لتحت علشان ياخذ دور او حاجه زى كده

مدير المستشفى
ده كله اشاعات ..

مصرى

لا انا متأكد انها اشاعات طبعاً .. طب ممكن اسم
حضرتك علشان ابقى اكتبه فى الموضوع بتاعى

مدير المستشفى

طبعاً . انا الدكتور مظهر البلوشى .. هو المريض قريبك فى غرفه كام ؟

م / 99 C ليل - داخلي

غرفة عم هلال بالمستشفى

عم هلال متأثر بيتسم كأنما رأي مافعله مصري بعينه.... عم هلال يكمل قراءه

صوت مصري

وانا شامم ريحة سجائر... اوعدني انك هاتبطلها

عم هلال يأخذ علبة السجاير من علي الكومودينو بجواره ويخبئها تحت المخده كأنما يراه مصري

م / 100 - 101 نهار - داخلي

غرفة مصري - صاله سعيد

هذا المشهد تقطيع متوازي بين سعيد في غرفة مصري وام سعيد في الصاله

سعيد يدخل الغرفه فيرى كاميرة مصري على السرير

سعيد

يانهار اسود ده نسي الكاميره

سعيد يجرى ليأخذ الكاميرا ويأخذها فيجد تحتها ورقه مطبقه فيأخذها

قطع A 101 - ام سعيد تفتح الظرف فتجد فيه فلوس المعاش وورقه عقد وحولها البنات وعبد المنصف ..

قطع A 100 - سعيد جالس بمسك الخطاب في يده ويقراءه ونسمع صوت مصري

صوت مصري

الكاميرا دي من النهارده بقت بتاعتك .. انا عارف ان انت كانت نفسك تبقى طيار .. معلى بقى التصوير حلو برضه ..

قطع B 101 - نرى ام سعيد تقراء الخطاب

صوت مصري

فانا قولت بدل ما ابتسام وعبد المنصف مركونين جنب جهازهم يعيشوا في الشقه وكأني ماجار هالهم .. بدل ماتتقل وصاحب العماره ياخذها ..

قطع B 100 - نرى سعيد بمسك الخطاب ويبتسم

صوت مصري

وبعدين ما انت عارف ياسعيد .. محدش في مصر بيطلع الحاجه اللي هو عايزها ..

قطع 101C - ام سعيد تقراء وتبكي

صوت مصري

ولو مفتاح الشقه عصلج زيتيه ..
وقوليلهم مصري بيقولوكوا مبروك ..

قطع 100C - سعيد يقرأ

صوت مصري

و علي فكره ياسعيد اللي بيترفضو في السفارة الامريكية مش الناس الزباله ولا حاجه...دول احسن ناس

ام سعيد تقلب الظرف فيقع مفتاح الشقه في كف يدها ويدخل سعيد من باب الشقه ومعه الجواب في يده وهي مازالت ممسكه بالجواب في يدها وينظرون لبعض

سعيد

مصري سابلي الكاميرا بتاعته

ام سعيد

وساب لاختك شفته .. توصل بالسلامه يابني

م / 102 نهار - داخلي

المطار -مدخل الطائرة

مصري يعبر من جهاز كشف المعادن وباسبوره الامريكي في يده...مصري يزمر...ضابط امن(هو نفس ضابط الامن الذي رأيناه اول الفيلم) يمر بجهاز كشف معادن يدوي علي جسم مصري...الجهاز يزمر عند مؤخرة مصري

مصري

دي شريحه في الحوض

الضابط يلحح باسبور مصري الامريكي

الضابط

لا الف سلامه يافتدم

مصري يتفهم

م/-/ 102 A نهار - داخلي

طائرة-الدرجة الاقتصادية

مصري يجلس سرحان والكرسي بجوار شاغر ونسمع صوت الكابتن وهو يرحب بالركاب...نري بجوار مصري في الصف الاوسط الولد القصير البيئـة الذي يري مصري..

الولد البيئـة

ادوك الفيزا بالفيلم اللي انت عملته ده...جديده

مصري حزينا لا يرد... يأتي الراكب الذي رأيناه سابقا يجلس مع مصري

الراكب (بحماس)

أهلا!!!!!!

مصري يبتسم بدون اي حماس .. الطائرة تتحرك علي الرن واي

الراكب

اخبار الرحلة ايه .. طبعاً زفت

مصري (متأثراً)

في حاجات زفت بس مصردي فيها حاجه كده ..

مصري يحاول الوصول للتعبير المناسب فلا يجده فيلتفت للولد البيئـة

مصري

مصر فيها ايه

الولد البيئـة (بتلقائية)

عفار

مصري ينظر للاشي ويحاول الوصول للتعبير...الولد البيئـة اصيح منتبها لحديث مصري

مصري (بتأثر للراكب)

لألا مش العفار .. فيها روح كده ..

الراكب

شريحه

مصري

لا لا مش قصدى .. الناس فيها

الولد البينة

همج

مصري

مش بالظبط .. تحس انهم

الراكب

حراميه

مصري

ايه ياعم انا اللي حاسس مش انتو ده انت غراب اوى

الطائره تهتز للاقلاع والانوارتطفئ .. مصري يغمض عينيه ... نري اهتزازات الاقلاع عليه وهو مغمض العينين.. الطائره تنتظم .. نسمع صوت اعتدال الطائره... الولد البينة يتفحص مجلة .. مصري يخرج كارت الكاميرا من جيبه .. مصري يقوم بوضع كارت الكاميرا بالاب توب بتاع الرجل بعد استأذانه والرجل يرحب بالفكره ..الراكب يضعط علي زر الباور الجهاز لا يعمل

الراكب(قاصدا الكومبيوتر)

مش عارف ماله

مصري

لحظه كده

مصري يأخذ الجهاز وينفخ في الزر...الجهاز يضيئ ويعمل ... تظهر الصور .. الرجل يتفحص الصور.. مصري يقلب الصور فنرى صورة ابو الهول والرجل الفلاح رافعا يده بالموبيل وكأنها موضوعه على اذن ابو الهول .. نري صورة سعيد على الكورنيش .. نري صورة رجل يضع علي رأسه سبت عيش ممثلي عن آخره ويقود عجله .. نرى صورته لأطفال علي التربة يعبرونها بواسطه الصال والاطفال فرحون .. نرى صورة رجل علي موتسيكل وامامه طفل ووراءه زوجته المحببه وثلاثة اطفال .. وصورة عازف العود بالحسين .. نرى صورته لمصري صورها له سعيد وهو مبتسم ولسانه خارج لبره وكأنه يقول طظ والراكب يشير الي صورته معينه

الراكب

الصورة دي متفكره طبعاً ... فكرتني بصورة

الواد الصومالي اللي انت وريتھالي

مصري ينظر للصورة ليري انها صورته لاتوبيس به زحام غير طبيعي والناس يخرجون من الشبابيك والسلم الرجل يشير الي رجل مبهدل عرقان ولكنه يضحك ... مصري يدخل زوم على وجه الرجل و يتفحص وجه الرجل الذي نراه عن قرب

مصري (ممسكا بالصورة)

الصورة ممكن يكون فيها حاجات حلوه بس احنا اللي مش شايفين

الراكب

حاجات حلوه مين.. زحمه وقرف واهانه

المضيفه تأتي بعربة المشروبات...يبدو انها عرفت مصري من ضحكته في اول مشهد

المضيفه (لمصري)

ازاي حضرتك ... تشرب ايه حضرتك

مصري
قهوة مانو سكر بره

المضيفه
في قهوه عاديه قهوه ديكاف

مصري
خلاص شاي

المضيفه تصب الشاي لمصري..الراكب بجوار مصري يشير للمضيفه بانه لا يريد ان يشرب

مصري
هو صحيح انت بتشتغل ايه فى امريكا

الراكب
كنت بغسل صحون و دلوقتي علي عريبه هوت دوج ..

مصري يخرج باسبوره الامريكي من جيبه وباسبوره المصري ويضعهم بجوار بعضهم

الراكب
ايه ده .. انت جيت الباسبور الامريكاني ... اظنه بيعمل
المعجزات مع الناس الزباله دى .. صح ..بعد اذنك اروح الحمام ؟

الراكب يقوم من مكانه ومصرى ينادى عليه

مصري
لوسمحت

الراكب يلتفت ومصرى يضربه بالبونيه فى وجهه..مصري يده تألمه من البونية... فيغمى عليه فى الكرسي المقابل ويغطيه

مصري
I love you اعملها على روحك وانت نايم

مصري يسحب الكارت من الكمبيوتر.. مصري يتأمل الباسبور المصري ثم الامريكي

مصري(قاصدا الباسبور الامريكي بسخرية)
بيعمل المعجزات

مصري تضيق عينه كأنما وافته فكره مصري يفتح زر القميص ويرخي الكرافته ويرن جرس استدعاء المضيفه وتأتى
وتري مصري يضع يده علي رقبته ويقلد طريقة سعيد بالطبط ويمثل بطريقة من يمثل لاول مره أنه يشعر بالاختناق

المضيفه (لمصري بقلق)
حضرتك كويس ؟

مصري يأخذ نفسه بصوت عالي بحشرجه بطريقة تمثيلية كأنه يموت اختناقا

مصري (بصوت متحشرج للمضيفه)
I have an aazma
عندي أزمه

المضيفه تتفحص مصري وتفتح له زر آخر للقميص .. المضيفه تتحدث في جهاز ...بعض الركاب يلتفون حول مصري منهم

الولد البيئـة

المضيفه (لكابتن في الجهاز)
كابتن في واحد عنده ازمه وتعبان اوي

الكابتن
جنسيته ايه ؟

المضيفه
شكله مصرى

الكابتن (بلامبالاه)
اديله مسكن احنا في الجو..

مصري يري بنصف عين مفتوحه فيتشنج جاذبا انتباهها ويمثل انه يبحث عن شئ في جيبه العلوي

الكابتن
او عي يكون الواد التخين
بتاع رحلة شرم الشيخ ..

المضيفه(بشك)
لأ مش هو... بس بيعمل نفس الحركات

مصري يزيد تشنجه

المضيفه (لمصري بشك)
الدواء؟؟

مصري يخرج نصف الباسبور الامريكي كأنه بيبحث عن الدواء ..المضيفه تمسك الباسبور الامريكي و تفتحه

المضيفه (بخوف لكابتن)
كابتن الحق ده طلع امريكاني

الولد البيئـة يضع يده علي رأسه قلقا

الولد البيئـه (لمصري)
امريكاني...ابوس ايدك فوء

م / 103 نهار - داخلي

السماء

نري الطائرة تلف حول نفسها لتعود ادراجها على صوت الكابتن

صوت الكابتن

اعزائي الركاب نعتذر لسيادتكم عن اضطرارنا للعودة الي
مطار القاهرة نظرا لوجود حالة حرجه عن متن الطائرة

م / 104 نهار - داخلي

امام المطار

مصرى يخرج من المطار فيجد راضى ينادى على الزباين الخواجات ولكنه انجليزيه مضبوطه

راضى

ليموزين سير ..

مصرى

راضى يامعفن

راضى يلتفت لمصرى

راضى

ايه ده ؟

مصرى

متأخرتش صح ..

مصرى يحتضن راضى

مصرى

والله وبقيت تقول ليموزين سير ..

م / 105 نهار - داخلي

مسرح المدرسه

مسرح المدرسه به اطفال من اعمار تيداء من الابتدائي حتى الثانوى .. ومن بين الاطفال نرى عبير .. والجميع مصطفون بالتدريج .. نري سعيد في الكواليس ...ميرفت تشير لسعيد ان ياتي ويبيدها جواب

ميرفت(بضيق)

ايه ده ؟؟

سعيد يأخذ الجواب ويقرأه ويحمر وجهه ويدرك حركة مصري

سعيد(باحراج)

والله انا متأسف لو ده ضايقك...ده مصري هو اللي ..انا

ميرفت(مقاطعة بهزار)

وانا موافقه

سعيد(بذهول)

موافقه

نسمع صوت الموسيقي ثم نري فيفيان هي المايسترو وتقود الاطفال والفرقه الموسيقيه .. وتبداء فيفيان بالاشاره الى الفرقة .. فتبداء الفرقة بالعزف (اغنيه مصريه وطنيه قديمه مؤثره سوف يتم اختيارها) .. ونرى الاطفال يغنون الاغنيه بشكل به ابداع وخلق جديد عن المتعارف عليه وليس غناء فقط .. ونرى الحاضرون عم هلال وام سعيد واخواته البنات ... والجميع .. مصرى يدخل المسرح فيراه الناس فيبتسمون برجوعه لهم .. سعيد يعطى لمصرى شنطة الكاميرا .. ويفتحها مصرى ويبداء بتصوير الاطفال..سعيد يصور بكاميرته هو ايضا... وهم يغنون .. ويصور ميرفت وهي تقود الاطفال والفرقة بمنتهى الابداع ونرى فيفيان .. ومصرى يقوم بتوصيل الكارت بالبرجوكاتور فتظهر صورته على الشاشه الكبيره فى خلفيه المسرح خلف الاطفال .. وفرحة الناظر بالطلبه وكأنهم اولاده .. ونرى ام عبير وهي تشير لعبير من على المسرح .. وفى النهايه نرى مصرى متأثر بالاغنيه لدرجة ان عينه تدمع .. وفيفيان تراه وتبتسم له ويبتسم لها .. ويقول لها من بعيد بدون ان يُخرج صوت (يرافو) .. سعيد يشير لمصري بالجواب في يده بامتنان...

مصري يمشى متجها الى باب المسرح ويقابل فيفيان ...نري علي المسرح فقره من مسرحيه يقدمها الاطفال بدون فيفيان

مصري(بود)

ده انتي فنانه بأه

فيفيان

يعني علي خفيف كده

مصري

تشرابي حاجه من الكانتين

فيفيان (تقولها بالفاء بطيبه وتلقائية)

ماشى... اشرب سفن

مصري

بصي نشرب اي حاجه مفيهاش فه... لاسفن ولا فانتا ولا السكه دي خالص.. تشربي شاي؟؟

فيفيان

اشرب شاي

م / 106 نهار - خارجى

المدرسه

مصري معه زجاجة المياه المعدنية ويسير بجوار فيفيان... يرتشف آخر رشفه في الزجاجة..... مصري يعود للوارء ناحية الزبالة... يفتح الزباله ويلقي بزجاجة المياه المعدنية... شئ يلتصق بيده من الزبالة...

مصري

ايه القرف ده

مصري يضع يده في جيبه ليخرج منديل فيخرج منديل وباسبوره الامريكي... مصري يمسك الباسبور الامريكي من طرفه موجه اياه للزباله كأنما يفكر يرميه ام لا... مصري يفلت الباسبور من يده لداخل الزبالة ثم يغلق الزباله ويغادر... مصري يري ورقه او (زجاجة مياه معدنيه ملقاه) علي الارض... مصري ياخذها ويعاود فتح الزباله ويلقيها... مصري يلح الباسبور... مصري يفكر ثم يمد يده ليأخذ الباسبور وينفضه ثم يضعه في جيبه

مصري

لا عم هلال يعيي تاني ولا حاجه

النهاية

تم بحمد الله

4/9/2009

A.L.M

PAGE 124

PAGE 3

PAGE

-PAGE 3-